




慶湖遺老詩集序



慶湖遺老者越人賀鑄方回也



大伯始居吳至王僚遇公子光之禍王子慶忌挺身  
犇衛妻子迸度泚水隱會稽上越人哀之予湖澤之  
田俾擅其利表其族曰慶氏名其田曰慶湖今為鏡  
湖傳謠也漢孝安帝時避帝本生諱改賀氏水亦號  
賀家湖馬家牒載謝承會稽先賢傳叙畧如此唐代  
既頌勲格百家圖譜併為煨地元和申林寶集著姓  
纂臆謂賀氏慶封之後非是按封劫專齊政田氏患  
之聚三族甲環其宮而夷其族封僅身免走魯遷吳

卒被屠戮安有遺種哉吾家特會稽一族他州之賀  
蓋賀蘭賀若賀跋賀婁賀魯賀葛賀賴賀述賀兒賀  
略孤吐賀諸姓省焉鑄十五代祖迺秘書外監之  
祖弟諱知止少味老易躬耕不仕開元末興宗玄學  
本道三以道舉薦送不赴會有聞于朝者起家拜上  
虞丞秩滿試任城令時李翰林白寓遊是邑與公相  
從于詩酒間謨其美政書公堂之壁後人饒詩石今  
或存焉久之遷陽穀令卒官民懷其惠遮留喪車不  
得時發因權寔縣之北原三孤即壠為廬免喪按安  
史之亂縣又改隸東平尋為李正己巢據之寔用非

法游民浮 禁不聽還伯仲定居陽穀俾季陰歸會  
稽以持先業皆力田自潔不復為仕宦計季實吾祖  
也歲一北走省展存歿且自誓約生雖居死當耐骨  
先壠之次逮七世孫遵約不墜後屬董昌盜越民罹  
其毒因棄北遷合族焉 國朝緣外戚賜第開封隆  
和里六代祖廣平王始別葬于浚儀固子陂之原高  
門平州府君受命北征即誥其家嗣曰吾家本慶氏  
昔王子嘗寓于衛而子必以舊氏名之吾死必封樹  
衛郊示不忘本府君竟歿事朔野曾門以哀毀廢于  
家但名其子而重誥之之 天聖初大門總北道坳

牧之正遂卜府君之新阡于衛屬邑共城東原仍徙  
貫焉行先志也鑄少有狂疾且慕外監之為人顧遷  
北已久嘗以北宗狂客自況今寢老且疾念歸何時  
而亟更舊稱者亦首此之義耳鑄生于 皇祐壬辰  
始七齡蒙先子專授五七言聲律日以章句自課迄  
元祐戊辰中間蓋半甲子凡著之藁者何啻五六千  
篇前此率三數年一閱故藁為妄作也即投諸煬竈  
灰滅後已者屢矣年髮過壯志氣日衰落吟諷雖夙  
所嗜亦頗厭調聲儷句之煩計後日所賦益寡而未  
必工于前念前日之爨燼為妄棄也始哀拾其餘而

繕寫之後八年僅得成集以雜言轉韻不拘古律者  
為歌行第一卷以聲義近古五字結句者為古體詩  
第二第三第四卷以聲從唐律五字結句者為近體  
五言第五卷以聲從唐律七字結句者為近體長句  
第六第七卷以不拘古律五字二韻者為言言絕句  
第八卷以聲從唐律七字二韻者為七言絕句第九  
卷隨篇叙其歲月與所賦之地者異時開卷回想陳  
迹喟然而嘆莞爾而笑猶足以起予狂也倘夢境幻  
身未遽壞滅嗣有所賦斷自己非歲列為後集云丙  
子十月庚戌江夏寶泉監阿堵齋序

慶湖詩集目錄

第一卷 歌行

叢臺歌

黃樓歌

彭城三詠

漁歌

江南曲

三鳥咏

東華馬上

廣四愁寄李諫

舟次金陵寄王掾

贈道士蹇拱辰

艤舟秦淮訪侍其瑀

寄墨贈楊時

留別僧訥

留別道士許自然

贈趙湧

留別田晝

調劉生

答靳生

亡女哀辭

老雀嘆

送王尉赴武康

送周守還朝

送僧還吳興

答許景亮

贈僧孚

送章和傑移家包山

題漢陽招真亭

晚出江城聞角

寄漢陽趙尉

送武庠歸隱終南

送王掾還海陵

王鈞環歌

南樓歌送慎守還朝

題潘氏亦顏齋

第二卷 古體上

故鄣

喜雨

老槐

過鼉掾

春行

對酒

閨情 二首

題巫山圖

詛蚊

燭蛾

病暑

暑夜

問內

食芡實

烹雞嘆

題華陽公主碑陰

題蘭陵王碑陰

邯鄲郡樓晚望

答杜仲觀登叢臺

冬夜寓直

送武

欽宗廟諱

之安陽

寄杜邨

訪周沆郭忱

除夜歎

寄杜仲觀

遊雲龍張氏山居

登黃樓懷蘇眉山

秋懷 二首

燕子樓

快哉亭

飛鴻亭

登快哉亭

讀李益詩

田園樂

此日足可惜

部兵之狄工

遊南臺

夏夜懷寄傳道

第三卷

古體中

和張謀父遊石佛山

夜行鄒縣道中遇雨

行路難

送寇元弼王文舉

人生七十稀

和杜仲觀青字詩 二首

送李主簿

四首

擬獨杵擣衣

擬夜中不能寐

擬寒宵嘆

擬雍丘燕溪

擬王少伯新興

送陳傳道之下邳

東畿舟居阻雪

留侯廟下作

遊靈壁蘭皋園

題王輅故居清軒

遊金陵雨花臺

宿法惠寺

題香社寺湯泉

宿慧日寺

懷寄王聞叟

腰疼山浮圖下作

登柏子岡懷寄泉師

歷陽十詠

第四卷 古體下

三山

望夫山

題烏江湯泉

罷官有期寄朋好

艤舟秦淮

金山遊

望焦山

金山夜集招米芾不至

留別黃材

題無心庵

和錢德循寓懷

題安上人北軒

感庭棗

送趙子億之官滄州

夏夜雨晴遣懷

寄題名嘉亭

遊盱眙南山

酬別杜輿

留別龜山白老

題棲雲庵

寄題周氏濂溪草堂

送周壽西上

題陶清節集後

補感遇詩

黃鶴樓

鸚鵡洲

懷寄周元弼 十首

題鄭判官直節亭

題潘大臨東軒

送陳令移官吳郡

和潘邠老漢上屬目



第五卷

近體五言

雨餘晚望

目訟

待曉朝謁天慶

送李易初還汶陽

重送

春書

擬温飛卿

快哉亭寓目 二首

題張氏白雲莊

賦得枕上聞雁

和人遊白雲莊 二首

早夏

辭酒

送陳傳道攝官雙溝

遊滕縣時氏園亭

自鄆還徐道中

早發王邨道中

暮投葛墟馬上

汴渠夜泊

舟次宋城

京居感興

玉津晚歸馬上

西城有懷

苦竹邨南馬上

題諸葛洪田家壁

訓桂林從叔

寄趙令翬

懷寄潘孝本

送張商老

題烏江鄧氏亭

懷潘景仁

宿田家

遊真如寺

之香林馬上

題丘氏歲寒亭

送左禹赴江夏尉

高望道中

湯泉道中

留別王掾

艤舟當利口寄朋遊

重別王掾

投宿清涼寺

懷寄王掾

秦淮夜泊

遊草堂寺

誚別彥上人

易官後呈交舊

懷王掾

廣津門東馬上

久病寄親友

秋夜聞雨晨興偶書

謝米元章見過

留別米雍丘

寶應野泊

題淨名齋寄米元章

龜山晚泊

舟居卧病寄和上人

泊臨淮懷杜修撰

舟發金陵望歷陽作

江行寫望

卽官湖

題寶泉官舍壁

江夏遇興

寄潘邠老

送陳主簿歸越

送金壇慎令

寄題杜子師草堂

慶湖遺老詩集 卷一

歌行 三十九首

叢臺歌 按邯鄲縣譜叢臺趙武靈王築起地

三百尺今故址猶十仞在縣中東北隅元豐

辛酉七月同邑令濮人杜儼仲觀登杜先有

此詩要予同賦

累土三百尺流火二千年人生物數不相待摧頽故  
址秋風前武靈舊壘今安在禿樹無陰因樵采玉簫  
金鏡未銷沈幾見耕夫到城賣君不見叢臺全盛時  
綺羅成市遊春暉一從瑤輦閉荒草蕭散行雲無復

歸韶魂想像風流在晴華露蔓猶依稀盤紆棘逕撩  
人衣禾黍晚成貉貉肥層簷碧瓦碎平地夢作鴛鴦  
相伴飛登臨弔古將語誰城郭人民今是非指君看  
取故時物南有清流西翠微彷徨華表不忍去豈獨  
遼東丁令威

黃樓歌

熙寧丁巳河決白馬東注齊宋之野

彭城南控呂梁水滙城下深二丈七尺太守  
眉山蘇公軾先詔調禁旅發公廩完城堞具  
舟楫拯溺飢民不告病增築子城之東門樓冠其上  
名之曰黃取土勝水之義樓城水退因合燕以落

坐客三十人皆文武知名士明年春蘇公移  
守吳興是冬謫居黃岡後五年轉徙汝海予  
因賦此以道徐人之思甲子仲冬彭城作

君不見熙寧丁巳秋靈平未塞河橫流澶漫勢欲浮  
東州斯人坐有為魚憂當時賢守維蘇侯猷術不取  
三犀牛跨城岩堯起黃樓五行相推土勝水鼉作龜  
驚走鞭箠三丈橫流變清泚南來船車鷁銜尾使君  
登覽興如何舞劍吟箋賓從多水平照影見雁下山  
空答響聞漁歌樓下汀洲長芳草一麾南出彭門道  
昨日春游咏白蘋後夜秋風悲服烏黃岡汝海心悠

慶湖遺老詩集 卷一  
哉青衫白髮多塵埃采菱伎女今何在騎竹兒童望  
不來望不來碧雲明月長徘徊

彭城三詠 元豐甲子予與彭城張仲連謀父

東萊寇昌朝元弼彭城陳師仲傳道臨城王  
適子立宋城王壯文舉采徐方陳迹分詠之  
予得戲馬臺斬蛇澤歌風臺三題即賦焉戲  
馬臺在郡城之南斬蛇澤在豐縣西二十里  
歌風臺在沛縣郭中

秦蛇已中斷劉項方龍戰叱咤沮風雲睚眦走霆電  
鴻溝一畫天地開楚王洗劍東歸來新都形勝控淮

泗籠山絡谷營高臺重瞳登覽何為者不知招賢知  
戲馬上如激矢下投九蘭筋霜腕便回盤半夜悲歌  
離不逝明日陰陵行路難駉叱三千歸漢閑粟豆尤  
聞蠹縣官君不見華山之陽古坳牧春風吹草年年  
綠右戲馬臺歌

君不聞泗濱亭長送徒如咸陽徒夫懷歸多道止澤  
中置酒飲相訣吾亦從此犇芒碭陰風蕭蕭導者懼  
前有修蛇怒橫路酒酣拔劍肯留行劃斷蜿蜒不回  
顧河明月出人踵來彼媪何冤號且哀謂遭赤子屠  
吾子語竟莫知安在哉真人聞此自心許茫茫四海

慶湖遺老詩集 卷一  
吾其主虎變龍飛十二年馘項臬英蓋狐鼠半夜雄  
鉞飛上天幾見長陵一杯土 右斬蛇澤歌

漢祖高風百尺臺千年客土生蒿萊何窮人事水東  
去如故地形山四來江淮猶沸鯨鯢血八十一車枉  
歸轍白首逢迎皆故人牢酒歡呼惜將別嶠澠迢遙  
非我鄉歿生此地何能忘酒闌鳴筑動雲物青衿兒  
曹隨抑揚爾時可無股肱良端思猛士守四方君不  
聞淮陰就縛何慨慷 平聲解道烏盡良弓藏 右歌風臺

詞

漁歌 甲子十二月張謀父陳傳道王子立會

于彭城東禪佛祠分漁樵農牧四題以代酒  
令予賦漁歌

嚴公桐江上呂父清渭濱出處兩能事寥寥乎若人  
擁篲叱笠吳儂子身偶一竿生寄水庖富饌美鱠  
鱸寸鬣分鱗辱刀几吾將一鈎縣十捷笑倚扶桑不  
計年鯢鯨懷餌脫相得坐使東南飲食鮮

江南曲 乙丑三月彭城分題得江南曲

遊倡牽杜若別浦鴛鴦夾落向晚鯉魚風客櫓 泊  
當時桃葉是新聲千載長餘隔水情烏衣巷裏人誰  
在白鷺洲邊草自生

三鳥詠 元祐戊辰三月之官歷陽石磧戊日  
從事于田野間始聞提壺竹雞子規三鳥其  
聲殊感人因賦之以寄京東朋好

綠野帶江春漠漠露溼花萼朝暮薄年芳婉婉欲辭  
人啼鳥殷勤勸行樂提壺真起予十千美酒當賸沽  
金龜寶貂家所無持底可遇黃公壚調官東 今幾  
日謂有公田宜種秫朝廷未除私釀律安得一試焦  
草術提壺鳥嘆吾與爾皆悠悠君不見長安兩市多  
高樓大書酒旂招貴遊脫聞提壺鳴樹頭論槽買甕  
更獻醅庶幾此聲知所投胡為南鄉長滯留端使北

宗狂客羞

北宗狂客方  
回自號也

右提壺引

東南澤國陂塘闊旱歲少逢晴五月田間鼃喜雨真  
真竹下雞啼泥滑滑而予不耕陂下田田臯驅馬揮  
長鞭稻塍微茫絕復連如躡鏡面流鮫涎植蔬沮洳  
不敢前何暇顧惜青連乾竹雞烏汝幸飛翔羅罽外  
安知此途吁可畏雄雌更鳴方自慰汝不能言臆為  
對君不見日圍赫赫是長安大明宮闕開雲端雞人  
唱漏辰三刻左右相君朝謁還前驕誰敢干後乘不  
可攀飄飄青蓋望已遠綠隄陰下沙隄閒長隄千步  
沙漫漫風不驚塵雨亦乾君能馳驚此其所何事江

鄉行路難 右竹雞詞

長江靡迤山坡陀旅竹荒松蒙葦蘿蠶初眠起風日  
暖梅弄黃時烟雨多山間有逕行逶迤倦客據鞍生  
睡魔奈爾思歸啼鳥何子規鳥不如歸去好誰家西  
北最高樓幾為王孫怨芳草子歸憐爾解歸飛我獨  
何心長不歸十年迹絕蘇門道夢裏舊遊知是非一  
官竊食官倉米十口之家飽而已金印錦衣耀閭里  
少年此心今老矣問舍求田從此始 右子規行

東華馬上懷寄清涼和公兼簡社中王拙居士  
東華在歷陽郡北八十里隔江與金陵相直

王字閒叟己巳十月賦

雞鳴統五鼓驅馬東華路月落朝上時雲披日生處  
搖搖漁艇子挂席凌江去送日思悠然橫槩聊一賦  
鴻雁南飛江北流亭亭雙塔是昇州前朝物色今何  
見白鷺平沙接石頭石頭城上清涼國中有彌天大  
比丘右軍遠孫傲時者巾鉢久從蓮社遊吾亦明年  
及瓜代一庵見寄外何求

廣四愁寄李諫 李字智父時為白馬從事庚

午七月歷陽賦

夜如何其夜未央斗星燦兮河蒼涼微月入牖窺曲



房侯虫刺促鳴我牀離憂歎來煎人腸夜如何其夜  
何長綠琴在薦兮擬楚秦之沈湘朱絃淫露兮聲戾  
指而不揚屏琴浩歌兮屑涕泗之浪浪我有所思兮  
在河之陽倏而不見兮衷難弭忘駉驥騰躍兮鴻鵠  
翱翔明璫玉案兮爾不戎將緘誠結兮久莫汝償  
永如牛女兮南北相望昔燕處兮靈芸之堂紉蘭為  
珮兮集芰為裳西風淒緊兮凌百草以殞黃蘭萎芰  
裂兮恐被服之不芳念汝玉立兮賤組繡之文章玄  
節曰厲兮奈慘慄之冰霜胡不乘白雲兮歸來乎帝  
鄉尚何所徯兮畢永歲而彷徨

舟次金陵懷寄歷陽王掾相

王字元胥庚午

十二月賦

昨時江北望江南把酒離愁已不堪今夜江南望江  
北抵掌清談安可得歷陽白下非吾鄉官身俗眼禁  
人在後日扁舟更西去江北江南兩何處

贈道士塞拱辰

嘗觀妙手御風圖想像斯人世所無今識黃冠葆光  
子爽氣飄飄畫不如岷峨東來九千里眼飽高山與  
流水乘春更擬訪天台晨肇當年偶然耳葆光子胡  
為乎鼎中龍虎煉成寶筆下鬼神驅作奴須君且置

是等事三復玄元皇帝書

艤舟秦淮雪中訪侍其瑀 侍其字服之庚午

十二月賦

北風破雨初雪齋舫蓬牕吹紙裂籃舁觸冷訪圓廬  
得把一杯聊耳熱人生自適待何時矧君與我皆衰  
遲會待晴天暖風日杖藜同赴北山期

寄墨代書贈楊時 楊字中立彭城僚友也為

南康刑獄掾庚午十二月金陵偶便因以詩

墨寄之

徂來雪壓蒼松顛淪膏根柢蟠蜿蜒樵斤翦枿石火

熱曲突百步凝梢烟蒲萄秋顆累累縣海膠九煉堪  
續絃力搗萬杵臼欲穿劑成圭璧隨方圓點漆比色  
石比堅坐令李韋羞居前陳臺潘谷老且賢授唯識  
者不計錢是翁解化如蛻蟬後可繼此無聞焉付君  
一圭款識全保護謹密何千年君家清風宜世傳不  
特談玄須草玄

留別僧訥 辛未正月金陵賦

冗從兩班誰比數牛僧馬醫猶介汝詩解窮人未必  
工苦調酸聲效梁父滎陽道人方外交謂我有言追  
屈騷驪珠不惜彈黃雀狗尾何堪聯晉貂秦淮潮上

扁舟發後日相思一書扎千里同風了了然人間無處無明月

留別道士許自然 自然山陽人喜談老易早為荆國王公所知嘗被召對于延和殿賜號葆光掌中太一宮文籍未幾謝病來菲山辛未正月相逢于金陵求予詩因賦此

東晉高賢許遠遊商孫今不墜風流還有臨川王太傅每思與語即登樓浮名何啻如雲薄鍾鼓爰居非所樂漱石枕流知善謔友月朋風差不惡吾亦塵間無所求終期采藥棲羅浮異日歸來遼海雀不見人

民見城郭

贈趙叅軍湧 趙字沛然工書得鍾王楷法辛

未二月高郵賦

髯參軍髯參軍平昔相好書相聞妙兼八法嗤五雲一字僅課三年勤春回玉樹生蘭筋驂騑氣壓千羸羣庾家之雞安足云君子硯漁而筆耘欽宗廟諱扇兮羊帚奈何不書彙珠秘錄之真文寶厨鈿軸絨靈芸閣居清絕無世紛誰其觀者紫陽君後日人間偶流落猶得標題持鍵鑰

留別田晝 田字承君始名至明字君義元豐

初滄陽同官也辛未二月邂逅于高郵因賦  
此以贈別

君家陋巷一尺泥吾車有輪馬有蹄  
犯寒踏雨重相遇明日扁舟吾遂西  
回首卽郵迹如掃離索十年成潦倒  
免葵燕麥春日妍蟬腹龜腸氣方飽  
雲達窅窅謝攀躋長缺與人還故棲  
異時結駟來南畝耕者老夫鋤者妻

調北鄰劉生

辛未六月京師賦時將為衡陽

之行

荒園老墻百堵破北鄰劉子南鄰賀  
今兩相望不相

過端怯衡陽芒屨

吾庖無魚未必餓晏飯糠覈煩

脾磨吾牀何容凡物坐書為睡媒  
卽牀卧彼子劉子

何所作佐方學商聲哦楚些細君  
夏瑟與之和相忘

之樂在江湖最靈者人情不無此日  
可惜難再圖秋

風西來莫挽吾後日相思幾千里  
書不盡言徒耗紙

答靳生 生名馳嗜酒而在自號為  
酒隱翁壬

申正月遣人持兩詩見投日索具報  
因賦此

軒軒陸士龍卓卓荀鳴雀雲間日下  
逢此段殊不惡方君嗜狂藥而吾窮  
病縛相望不相過賦詩聊介謹知君  
酒隱慕先賢誰何合問作飲中仙  
金陵妙唱丹

廣道主人詩集 卷一  
砂絃當日新聲傳不傳莫學滄波弄雲月老鮫哆口  
饒流涎訪吾之居在何許春明門東大道邊青鞵布  
鞵不妨步何待東家蹇驢乃著鞭我屋真無坐客氈  
蒲團檉机共蕭然鬪雞走狗春風顛付與垣東惡少  
年

亡女勝璋哀辭 適汶陽知氏子彥修三年而

歿甲戌三月海陵賦

百疴沈頓彌兩年何圖壯女歿我先失聲忍號氣窒  
咽淚如綆縻汲九泉嗚呼尚敢尤諸天託非其人歿  
失所父孱母罵猶棄汝吞卒咀楚申何許萋萋殞英

春不主嗚呼萬古為冤土

老宦嘆 海陵蘇氏即居之南鑿小池以蓄雙

雀甲戌夏旱池涸如陸是雀飢立庭除間主  
人莫卹也因賦詩以嘆之

華表華表歸來乎出無車食無魚懿公之遇難再圖  
卑棲俛啄同羣雛誰謂稭氏子不孤強顏市井交屠  
沽巨源密啟亦已疎嗚呼衛侯既不可作道林今也  
則無露鳴風舞何區區夙夜供君耳目娛西山二子  
飢相似南國三閭放不如端慮盤餐懷異味併隨焦  
尾付庖廚

廣雅遺書卷一 卷一  
送王安節赴武康尉 荆國公族弟也甲戌六

月海陵賦

江左風華推第一王氏堂堂文獻出烏衣諸郎能少  
屈尚執中司三尺律君方色養白頭親吳興水陸饒  
甘新下山之下茗溪濱一洗長安肥馬塵君不見昔  
人負米長勤捧檄喜敢論州縣徒勞耳

送海陵周太守仰受代還朝 周字開祖嘗宰

管城有聲甲戌六月賦

湯湯水東流奈何載此西行舟統如五鼓鳴城頭使  
君去矣不可留前日使君來天子惠此州傳道管城

政先聲走羣偷不關外戶息吠犬悉把鉤鋤誰帶牛  
雨暘不違禱烏鹵數倍收吏却一錢賄獄無五木囚  
黃堂坐嘯有餘暇八詠新詩追隱侯斯民幸使君畢  
世為吾休俄及瓜時代本朝官重內舊通金門籍行  
奉玉宸對問君何以治海陵但陳聖主之德臣何能  
狂生有意水衡丞

送僧雲還吳興 雲喜作小詩稍不俗甲戌七

月海陵賦

吳興道人美風度月下滄浪翹白露晝公詩律尚能  
傳聞有赤鳥黃耳句海角相逢一笑新懷歸不待白

春寄聲故國羣兒輩潦倒塵埃賀季真

答許景亮 許永嘉人字少明力學喜為詩惠

然出長篇見投況我以鄧高密謝太傅即賦  
以答時予將為江夏之行兼與之別乙亥九

月京師賦

東嘉海上孕瓌怪之子人英晦當代發之辭章聊一  
噫下界雷鼓霜鍾警聾瞶投吾夜光散下拜相期過高  
幸少殺君家風鑒嚴簡汰顧吾衰遲積疴瘵久隱墻  
東慕牛僧絕望仲華安石輩老矣狂奴枕故態清思  
屢遭俗子敗絮衣棘徑動胃礙京塵浼人更難奈何

擘一舟犯滂湃五斗無餘雜糠稗全家飮飡雲夢莖  
黃雀登臨指天外燕子西飛書可待訪吾少明安好  
在

贈僧孚 熙寧末予罷官趙郡日與僑人竇了  
然遊後十年復相遇于徐之蕭縣丙子三月  
之官江夏舟次長蘆有僧永孚見過乃了然  
也將之廬阜予要偕行乞一詩遂賦

北道交遊竇了然手持丹訣口談禪吾年方少不解  
事貪酒狂歌相助癘十載驅車道梁楚汲水之陽一  
坏堵著書直上窺鸞熊鄭圃潦園聊介汝旋門警作

去鄉行聲迹相遼掃風雨我遭官縛未渠央君割塵  
緣遽如許扁舟三月溯長川故人投謁俄童顛周妻  
何肉敗吾事成佛定輸靈運先此行歷涉佳山水隨  
牒不妨行樂耳與君更結蓮社遊徑取孟囊付舟尾  
送章邦傑移家餘杭包家山 章字子才熙寧  
中僚友也自江州瑞昌令休官居城中十三  
年不與人事為道友築室相招遂有是行丙  
子五月道由九江邂逅章登舟南浦因賦是詩

九江賢令尹千載兩相望昔也陶彭澤今之章瑞昌  
拂衣置五斗高興挹羲皇避俗陶無悔達生吾與章

淵明三徑荒松菊我携一瓢寓僧屋淵明乞食踵人  
門我賣神丸辦蔬粥淵明為酒接休元我每移書謝  
州牧淵明紙筆課兒曹我子長歌紫芝曲蕭開門戶  
十三年尚畏塵緣生處熟行將卜隱包家山誓與蒼  
生鍊大還願君門外誅榛管來者勿拒容躋攀鏡湖  
遺老老且孱猶堪護鼎訶神姦功成拔宅自仙去唯  
餘井臼留人間

題漢陽招真亭 亭在大別峰頂郡守吳興劉

誼宜翁營

高宗  
唐諱

以招江夏黃雀之仙劉每自稱

有不死術亭成後二年物故于淮陰道中予



適見之一無它異丙子八月獨登因賦此  
大別山顛清沔尾飛亭岿堯帶雲起清狂使君初燕  
喜拍手招呼黃鶴子玄津煉出太陽酥丰茸胎髮蒙  
頭顱每夸久落北鄴籍豈意齋恨歸黃壚越客登臨  
興何有愁不能言病妨酒殘陽雲夢宵然淡尚欲開  
襟吞八九羽駕飄飄安在哉使君餘跡已塵埃但見  
庾令樓橫烟樹杪角聲催月渡江來

晚出江城聞角

丙子九月晦江夏作

古壕沮洳荷葉枯矍鑠禿鷲行且漁山銜日脚水關  
掩孤樓引角吹單于胡馬西風興非淺壯圖舊迹隨

塵卷秋盡湖邊雁不來流落方悲去人遠十月之交  
五夜長河橫斗直天蒼涼蘇門故里斗杓下豈無伯  
仲勤相望君不見剡蓬為矢孤絃桑男兒落地志四  
方履屐無根著家巷道梁適楚猶吾鄉雖鷓不踰濟  
橘渡淮為枳吾心沉物未應然隨牒官身聊尔耳

寄漢陽趙尉沔

趙字道原滂之從兄丙子十

月江夏賦

慶湖遺老坐詩窮強仕之年百病攻誰謂南昌祿隱  
翁伏枕呻吟四壁空相思限此江西東寄聲每託江  
頭風斯言近俳聊一笑江水方清飢可療人生竒偶

類探籌造物豈容人數料君初試吏或當然我大半  
生真不調昔不願起家百日登三司今不願還家六  
印金索索但願官糧辦親養歸來尚餘三徑資鄰墻  
晏起訪安否介酌我歌堯舜時咄嗟此願良難必吞  
聲食藥甘如蜜

送武庠歸隱終南 武字明叔近號今是翁銜

命巴峽還道由江夏過我乞詩為賦丙子十

二月

君不見南朝豪雋有郗生自歎出身時網嬰樂聞栖  
遁去人者傾金累百贈其行關西武即將家種心實

慕儒官冗從春走巴東歲暮還逢迎偶在江南夢過  
門把酒豁清襟行將歸隱南山陰終焉之計咄嗟辨  
願賦一詩輕百金吾聞自古成秦稱陸海六印可求  
田莫買別墅三千畝上腴將軍部曲猶多在未應親  
手把鉤鋤歲事經營付家宰一官換得今是翁昔何  
所縛今誰解携琴領鶴白雲鄉身世相遼自兩忘北  
窗仰枕安足道未知何者為羲皇豈不聞俛首塵埃  
百僚底南北推遷隨尺紙摩肩接武半臺輿誰謂淮  
陰非噲比君家鼎甲盛先唐兩都朱却森相望天道  
惡盈幾赤族當時賴有安平王慶牒蟬聯今幾代雲

孫庠繼遊方外他時野史逸民篇鑄也磨鉛跋而待  
 送鄂州刑獄掾王懋元功罷官還海陵兼簡金  
 陵和上人 前此三年予客海陵送王之官  
 酌別于橫塘此詩丁丑二月賦  
 暖雲芳草橫塘路送客何之官鄂渚江臯暑溼氣如  
 蒸別來何之還海陵海陵鄂渚非吾土每後君來先我  
 去人無根蒂本悠悠況指滄波是舟路君方少健我  
 衰遲跼蹙轅間不自持因行寄聲雁門遠歲莫敢忘  
 林下期好去將無同語掾行見春風花滿縣隱顯它  
 年不我遺為續白蓮社十八傳

王鈞環歌

諸王孫士汙澄源以蒼玉環螳螂

鈞見貺助飭野服因以珉玉盤博山爐成氏

箭建殘龍茶五物并此歌為報丁丑十月江夏賦

良工得玉藍溪窟相璞命形心匠出螳螂屈強平疑

有骨頸系一環猶莫屈鏡湖老狂猷袍笏素襪纁緇

須此物價比連城不容乞王侯輟好人所難何以報

之明月盤薰爐波面山巒玩吾鄉美竒鷗雞翰闔菟

兔盈霜毛寒稱是頭貢雙龍團聊送公齋增冗長短

歌粗可評珍既吾方野裝事遊放跼步矐顏曳藜杖

薄莫微吟江漢上彼漁丈人誤相訪謂似三閭大夫

樣

南樓歌送武昌慎太守還朝 慎名宗傑吳人

其先錢氏貴戚戊寅三月江夏賦

君不見鄂渚山環少去城半高身之衝仰飛觀裴回  
華月天一隅縹緲青山江兩岬題榜南樓非昔時今  
人可復識元規唯餘在得昔明月與此江山常住持  
公堂坐嘯無留事清夜登臨誰辨此流風逸響殆千  
年初見東吳貴公子刺繁健手付方州迎刃未始逢  
全牛潢池小兒歸田疇田無高下乃多收每尋不淺  
胡牀興更有歌人行酒籌明日雲颿望堯闕鏡湖老

生愁欲絕一錢何敢浼劉公送行聊以南樓月照見  
金閨待漏時結珮正冠勤晚謁公乎莫負鱸魚菘菜  
斯衣錦東還使持節

題黃岡東坡潘氏亦顏齋 潘幽老昆仲躬耕

于東坡葺亦顏齋以偃息求詩于我為賦之

元符戊寅六月江夏作

東坡有田誰料理薰面蒼毛潘氏子結茅題榜亦顏  
齋農隙把書聊自喜潘乎潘乎信是顏之徒終日何  
所論難真如愚世無孔 四科友猶辨簞食瓢飲陋  
巷環墻居百畝之收粒可數天南有待東坡主更輸

什一補官倉餘勺幾何供雀鼠會須不改其樂媚而  
翁力田水旱由天公大勝心迹相違阮校尉東西南  
北哭途窮

慶湖遺老詩集 卷二

古體詩上 四十首

故鄴 按鄴都記漢建安十二年曹操滅袁氏

始大築鄴當時京兆洛陽南陽許皆大都而

鄴為之長操子丕代漢復定都洛陽此後僭

竊更據鄴而未始殘元魏孝文帝自代南巡

駐蹕鄴下久之以南望 人山北接柏人縣

非善地遂去之河南將作挂飯罍于城樓上

識者解之挂飯懸滄也豈待玄孫宅此乎至

孝靜帝果為高歡劫遷都鄴齊五主營建宮

室規模壯麗遠逾前魏周武平齊焚撤畧盡  
及楊堅克尉迴遂滂瀦之築京觀于葛屨山  
徙郡汝安陽鄴猶為屬邑熙寧間始廢之戊  
午九月獨遊晚歸馬上賦

魏武昔恢圖北平譚尚孽卜鄴築新都非徒三狡穴  
將行遷鼎志遽有分香訣落日總惟空奠終歌舞闕  
旋聞漣洛上載起蒼龍闕四葉不歸東苔花馳道絕  
食槽讖終挂飯期先決擾攘百年間覆車尋此輒  
山川氣象變朝市繁華歇白露復青蕪茫茫換時節  
陰風吹葛屨燐火走兵血木葉下西陵寒虫助騷屑

當時陪葬骨馬鬣猶環列隧碣什縱橫鐫文久殘缺  
帛砧與柱礎螭首隨分裂指此一杯間賢愚兩何別  
悠悠鳳漳水寂寂雀臺月千古配英魂未隨埃盡滅  
田臯訪遺老謂有興亡說但聽黍離篇叱牛耕不輟  
喜雨 已未予官滄陽涉春早熟四月晦雨始  
大澍而二麥已禱死采老農之言賦是詩

終春久旱嘆涉夏俄溽暑垢汗浼衣襟梅津蒸柱礎  
黃靈開赤景測候錯辰午沙燕逐風鳶翻飛遡來雨  
紛紛白羽箭齊發萬牛弩落瓦復鳴堦浮漚如沸煮  
宗朝已沛決枯渴頓清瘡田父喜過從迎門好相語

蠶桑薄可具豚酒與簫鼓擇吉謝叢祠巫嫫罷狂舞  
晨炊飽丁壯庀笠耕烏鹵少緩麥租期庶將秋稼補  
輸入太倉中蕃肥任黃鼠

老槐 卽鄆郡南滄水上有大老槐無復生意

人偶夜休其下聞吟嘆之聲發空腹中益臬  
狐所憑而里人輒以為神也因築壇建社祀  
禱甚勤予感而賦是詩己未八月

老樹久枯禿俯臨清路塵曾無席地蔭庇喝及斯民  
臬巢與狐穴兇怪相憑親嗥嘯屬陰黑驚搖苟近人  
周環築級壇立社祀秋春既享不材壽濫當有土神

勿感巫婦言請揮樵夫斤猶疑終竊據復作後來薪  
過鼉掾端智 鼉字祖禹滄陽法曹掾己未九

月賦

西風吹晚雨飢雀噪寒叢文舉對談客坐慙觴豆空  
咄嗟宦遊子負病畧相同斗俸折腰得醉錢常不供  
君看北里兒高堂燕歌鍾雖夸酒無美飽德何由豐  
吾豈乞墦者不為妻妾容永懷冰檠操未媿屠酤雄

春行 庚申三月滄陽賦

風俗喜嘉辰行樂東城春入歌芍藥章馬渡楊柳津  
田畝久枯渴麥芒棲暗塵焦心戴白叟日望西郊雲

對酒 庚申三月晦滄陽賦

白駒不可駐尺璧非所珍獨挹一樽酒悲歌送組春  
歌闌酒亦盡回首迹已陳自笑十年仕尚迷天下津  
豈無濯纓水奈爾長路塵命也復何道今人猶昔人

閒情 二首 庚申四月同滄陽田參軍至明賦

青窻隱夕曛玉甃紫苔春佳人久不見翠被銷檀薰  
長巾拂綠綺上有三年塵聊彈別燕弄寄謝陽臺雲  
秋風動朱箔流塵污鴛綺念昔合歡人兩心今萬里  
冰霜變松竹况復桃李欲寓相思文無多右軍紙

題巫山圖 滄陽張氏出此畫蓋唐人畫庚申

四月賦

巫山彼美 秀色發朝雲絢麗不可挹飄颻去無痕  
楚夢一夕後蒼山秋復春目斷腸亦斷往來今古人

詛蚊 庚申五月滄陽賦

公舍踞陰溝維蚊得所在朝昕滅聲迹曛莫相期會  
挾是黨與繁豈資軀力大飢心過狼貪毒喙甚蜂蠆  
侑張巧中 去人勇悍將何奈貧無綃葛網拙計焮蕭  
艾徒自取熏蒸舉家更 平噉欬烟銷尚鼓篋夜久禦  
益懈坦腹恣交攻煩瘡如搔疥神疲復夢悖少不容  
清快如何造物工種此生民害安得長風驅投諸四



荒外斷之嚴霜誅併命不可貸醜類倘一遺餘孽行  
當再

燭蛾 庚申五月滄陽席上賦

鬼蛾來翩翩慕此堂上燭附矣竟何功自取焚如酷  
感彼萬動微保生在無欲不見清林蟬飲風聊自足

病暑 唐申六月滄陽賦

早夏景延永烈日天中央欬欬燎原野中去人如揆  
湯病肺苦焦渴吐舌生喉瘡蔗漿與茗飲未易蘇膏  
旨稍驚氣象變雲物未冥茫仰枕視簷際浩浩浮滄  
江忽得灌頂偈灑然心地涼雷公未鼓怒風伯何猖

狂掃蕩太宇空萬影才斜陽俯辭楚臺上拱立齊鼎  
旁一介命螻蟻敢干私雨暘田夫信無罪觸熱正驅  
蝗

暑夜 庚申六月滄陽賦

渴蟬鳴中夜木葉 無風襟苧不加帶猶如被蒙茸  
三庚信可畏一扇曾何功安得解民愠蒼梧埋古桐

問內 庚申六月滄陽賦

庚伏獸蒸暑細君弄鍼縷烏締百結裘茹繭加彌補  
勞問汝何為經營特先期婦工乃我職一日安敢墮  
嘗聞古俚語君子毋見嗤癯女將有行始求爨艾醫

須衣待僵凍何異斯人癡蕉葛此時好冰霜非所宜  
食芡羹作 庚申六月卽鄆郡從事錢景榮德

父席上賦

錢侯官舍旁走水來方塘暑雨過初伏斜陽生晚涼  
風翻芡盤卷萬莆爭低昂猶疑秦雞暴擅此六國場  
下榻延密客開樽薦新嘗金刀剝老蚌玉沙磨夜光  
殷勤煩釘鉅未咀悲生腸引領鄆衛西百泉乃吾鄉  
水產富此物數錢論斗量朝餐取饜飽無復炊黃粱  
貪嗜比羊棗况乎惟味良十年去國仕遇得才微芒  
季鷹思蓴羨拂衣謝齊王我亦散浪者未許斯人狂

長歌定行矣千載會相望

烹雞嘆

庚申七月客過滏陽道近時有人觀

庖人宰三雞一雄就縛而鳴不輟因嘆曰禽

鳥將死知時且鳴吾安得默默求容于世因極口

肆言俄抵机穿幾不得免于感而賦此云

膳夫縛三雞二雌先就烹一雄置机上不廢知時鳴  
有客見之嘆人情猶物情寧昌言即死何喋口偷生  
愚聞此客言退思因竊評雞實昂俎資殺身非罪聲  
人忘樞機械鼓舌為禍萌宜念千金軀與雞何重輕

題華陽公主碑陰

按碑公主名季豔魏孝文

帝之孫年十四降高歡弟瑛主與瑛皆蚤歿  
齊建國瑛追王趙郡主為王妃碑表其墓盧思道  
文姚淑書在滏陽之南七里庚申八月晦日賦  
王姬乘鳳去春色一朝空昔怨綺羅月今無松柏風  
千年見白日狐穴入幽宮玉鏡古塵滿落梅誰復容  
峨峨當隧碑寶刻一何工文擅色絲美但書膏邑封  
惜非丈夫烈不得傳無窮好在故時物清漳流自東  
題蘭陵王碑陰 碑載王名肅字長恭北齊文  
襄之子按北史直書長恭而沒其名蓋當時以  
字行而史失其詳余王有武畧善撫士每得一

瓜數李必分甘餌衆金鏞之戰免胄先登推功  
第一今蘭陵王曲即凱歌也為後主所忌得疾  
不治而卒以鳩夢碑陰刻王弟延宗一詩甚哀  
墓在滏陽西南十里道占其東夏潦所湊壠已  
半圯碑字大兼寸隸法有古氣而不著書人  
名文乃盧思道也庚申九月十日賦

齊室生武賢蘭陵乃頗牧析瓜饗虎士鬻尉比梁肉  
金墉免胄戰破陣何神速樂府有遺聲當歌凱旋曲  
盤宗既不壽霸祚宜余促十代六百年人間換陵谷  
荒途接幽壠誰復禁樵牧窆石半歌摧鉤鋤斷鼉足

蒼苔蝕琢刻仰睇眩塵目操翰無媿辭千言不為辱  
流湍蓄馬鬣客土日危感靈潦併年間弥漫即川陸  
昔多萬兩送今無一杯築人生妄區別共盡同草木  
何待雍門彈令君淚盈旬

邯鄲郡樓晚望 庚申九月賦

新涼瀉軒檻草木帶秋聲閣水倒嵐影洗磨刀戟明  
百虫莫鳴動一鳥歸思軒晚律駭徂景羈懷念勞生  
去國亦已久己年今復庚官倉容雀耗世路忌蝸爭  
顧我實荒浪誤拋樵與耕竹木微逕在奚獨古人行  
答杜仲觀登叢臺見寄 庚申九月滏陽賦

高風蕩河漢白露被寒菊下有絡緯虫凄酸生意促  
華年不相待去我何流速老步失騰驤短轅甘跼蹐  
伊人濮陽秀方厭折腰辱仕道塞榛蕪低徊避蚘蝮  
邯鄲古都會陳迹武靈築興發即登臨西南幾窮日  
新詩琢璠琰叠寄两三幅一聽郢中歌陽春回草木  
行將及瓜代暫喜擺羈束鞭馬徑相過連朝奉遊矚  
隻雞與斗黍禮意未為足何以遇高陽多營甕頭醪

冬夜寓直 庚申十月滏陽賦

落月半侵窗蛩聲寒到牀羈人不堪此夢後夜仍長  
結衣出庭戶河漢正蒼涼浮陰暝四野耒雁不知行

慶湖遺集  
陳物悲莫節畏途懷故鄉十年泥滓賤半生靴板忙  
豈不志事功筋駭難自強壯毛抽寸霜烈胆磨尺鋼  
素尚竟誰許行歌追楚狂

送武

欽宗  
庶端

之安陽

辛酉七月冠氏席上賦

黃金絡征轡之子待明發樽酒少遲留禪林見涼月  
歌鬟結蛾黛怨此佳期闊去去柳堤風青蟬催白髮

寄杜邯鄲

予寓居魏之冠氏杜仲觀以詩相

招屬大河北徙莫知其津竟不果赴但賦此  
答之時辛酉八月也

窮巷歎多雨顏垣藜藿生蜩蟬飽風露晏景一何清

坐指歲芳歇羈人心骨驚所懷不可見東州聞政聲  
三年但絃歌百里稱神明風月動高興詩章時一鳴  
天葩落健筆直與春工爭渾河失故渠怒水方縱橫  
難憑束葦濟跬步萬里程夢想不知遠笑談何可并  
賴有西飛翰尺紙紙馳情

訪周沆郭忱

周字文清郭字天輔皆吾僚壻

也辛酉仲冬自魏趨關始及北郊首訪二子  
于葫蘆園延款連日因賦是詩

前日去薄官驅車望城闕情親周與郭契闊多年別  
征袍未及解徑造郊扉謁存問審安娛芝眉慰懷渴

家飽具羹炙笑我猶饕餮野色夜蒼茫松陰步微月  
悲風應長嘯灑面如冰雪狹室燭光清壞爐擁駝褐  
歡呼講舊好鄰夢憎驚聒念昔初冠年朋從事顛蹶  
忽忽一回首身志老成拙居諸信過邁又值陽生節  
春物行可期良遊須屢結婦家酒醅美升斗容可輟  
斟酌挹東君手選時芳折樽前有餘樂身外無所切  
欲尋玉清路難訪金丹訣修短三萬朝黃塵共埋滅

除夜嘆 辛酉京師示周流

壯髮忽種種華年今復窮客懷少安 况乃京塵中  
病肺馱斟酌疲筋謝過從聞坊稅老屋車馬無來蹤

日俸才百錢鹽齏猶不供夜榻覆龍具晨炊熏馬通  
出門欲賃乞羞汗難為容安得一扁舟浮家乘興東  
江山北淡隱終老為田翁春秋二頃苗秋穫期百鍾  
稚子課樵汲壯妻兼織春行歌滄浪清卧快柴桑風  
神明養內觀憂患無旁攻有客聞此言謂予何不衷  
茲行果勇決誰攬冥冥鴻安知祿籍間去就如樊籠  
微尚良自信所悲君不同

寄杜仲觀 辛酉二月予罷官滏陽訪仲觀于

邯鄲屬雨後晴和城邑人已衣袷既登叢臺  
風色淒緊尚如隆冬時臺下有佛祠庭中得斷碑

乃蔡有鄰書嚴挺之叢臺懷古賦也因請仲觀樹  
之壁間佛祠西去二三里有王氏園偶諸俳倡  
將祀神者因置酒按之邑人立岩起次說與焉  
明日相別是冬仲觀亦受代復調南康船官  
壬戌八月予至彭城登高有懷因賦此以寄  
中春雨收霽與子登叢臺形勝宛然在太行西北來  
無情百尺土千載未推頽四顧發悲嘯淒風振頽頽  
凌高氣象變似不容徘徊下出破禪刹斷碑生紫苔  
嚴公賦懷古復使後人哀西尋王氏園一徑趨城隈  
老竹未萌荀繁花如雪開惠然丘少年逸躅欣攀陪

小榭羅醺豆開簾按俳詼招呼縹緲人晚鐘催收梅  
水調唱金縷雲壘浮玉醅傾腸敢惜醉忘著接羅回  
明月遂分首舊遊安在哉我為東徐官客鬢棲塵埃  
君調南康吏江山役清才西風吹去雁尺紙為君裁  
我已困推辱壯心如溼灰行將隱名姓采藥孫登嵬  
共城山名異日儻相過衙門剪蒿萊

遊雲龍張氏山居 雲龍山距彭城郭南三里

郡人張天驥聖途築亭于西麓元豐初郡守  
眉山蘇公屢登燕于此亭下畜二鶴因以放  
鶴名亭復為之記亭下有小屋曰蘇齋壁間

榜眉山所留二詩及畫大枯株亦公醉筆也  
亭上一徑至山腹有石如礮治者公復題三  
十許字記戊午仲冬雪後與二三子携惠山  
泉烹鳳團此岩下張即饒之壬戌秋予初至  
徐張惠然見臨繼相招為山中遊八月晦日  
遂往莫歸馬上賦此

昔聞張逸氏卜築雲龍山東望結遐想喜得彭城官  
一語定襟契宛如平生歡招携屬休沐投此蘿薜閒  
女僕候門巷桂雙翠鬟蘇齋軒戶明餅火焚椒蘭寶  
墨鬼神護清詩冰玉寒森然拱簷雷架石排琅玕東

趨放鶴亭磴道披茅菅指顧百邛落炊烟林莽間日  
脚灑平陸兩山如斷髮淒風振晚葉坐怯衣裘單引  
頰紫霄極飄飄如可干緬懷眉山公五馬來遊盤酣  
興走顛筆蒼崖即饒刊午年仲冬月雪野雲彌漫掃  
石坐舒嘯惠泉烹鳳團當時詫盛集千古陋達安俛  
仰迹遂陳斯人久泥蟠我來後千日逸躡何由攀遇  
勝不能賦俯尋塵路還山英移未勒時款白雲關

登黃樓有懷蘇眉山 時公謫居黃岡壬戌八

月彭城作

登黃樓望黃州黃州望不見樓下水東流水流何可



留浮雲更悠悠傷心澤畔客憔悴楚蘭秋

秋懷二首 壬戌九月彭城賦

室邇人尚遠况乎千里間豈徒道路長重水復重山  
清霜老芳物嘉樹不堪攀欲寄隴頭信春風殊未還  
蕭蕭庭木落格格雞聲惡荒簷日影斜飢猫捕黃雀  
窗間養病客起念丘園樂欲賦歸去來西風老藜藿  
燕子樓 唐徐牧張建封晚得姬人哂哂寵嬖  
之為起子樓于使宅北城上以處焉後更兵  
火樓不復存天聖中故相濮陽李公出守彭城復  
樓于故址壬戌重九後一日予與二三僚友置酒

樓上分韻賦詩偶得如字而侍酒官妓亦有  
名哂哂者蓋竊希唐人因為見于卒章

城據山川勝千年楚故都高樓臨汜水楊柳蔭芙蓉  
唐室中多故將軍老鎮徐毬場朝戲馬玉帳夜投壺  
白雪徵清唱黃金得綠珠春風樓上醺三日極歡娛  
紅粉夢雲散白楊兵火餘當年賀厦燕老盡幾番雛  
曲徑擁黃葉西風時掃除寒鴟蹲老樹睥睨女墻狐  
有客晚登覽傍徨思壯圖荆榛閉銅雀麋鹿遊姑蘇  
陳迹豈足道舊歡何日無朱闌開酒場寶勒迎官奴  
醉袖舞雉雉艷聲歌鷓鴣遲留故時月桂影來座隅

回首一相詫今人如不如

快哉亭 彭城郡城之東南隅提點刑獄官廢

廨也熙寧末魏郡李公持節來此高宗亭上郡

太守眉山蘇公命名曰快哉亭下有爽塏數

十步即唐人薛能陽春亭故址也癸亥六月

始登此亭因賦是詩

飛亭冠城隅空闊延四望夙昔兩文雄胡牀此相向

山川氣候美詩酒風神王彈壓許昌侯陽春慙俚唱

麾車忽南北榮辱生譽謗一躡雲遶間一落江湖上

我來得陳躡伏檻徒怙悵可畏此塵籠歸哉養荒浪

飛鳴亭 彭城南禪佛祠據戲馬臺之麓有岩

山出其上方廣信倍尋可立柱石癸亥秋九

月太守河南王公說命僧起亭冠焉亭成置酒以

樂之而未得嘉名以稱也時天晴木落旅雁南下

復有聲琴于座者公偶誦嵇叔夜目送歸鴻手

拊五絃之詩因以飛鳴榜之是冬十二月十

日復興李昭玘 父揚中立同登因賦是詩

禪林跨山脅飛高宗鑿峻嶒千里寄雙睫百憂消一登

斯遊屬公暇曉日東南升霜野明練甲雲陰垂海鵬

東州地陽暖臘月川無冰大 出洪口突去如騫騰

跌坐思方寂桐魚聞飯僧生臺飽馴鴿散上浮圖層  
矯首發長嘯清風鼓塵膺寥寥紫虛路鴻雁正憑凌  
仿像中散公俯手朱絲繩粉繪久零落爽靈呼不應  
顧予識尤寡况復無才稱行且置纓笏庵棲宗大乘  
二子勿多誚有心何不能

上已後一日登快哉亭作 甲子年賦

上已信嘉辰流觴傳舊俗良遊悵不遂吏局方有屬  
東風吹曉雨方竅嗥林麓疑有泊舟人狂歌河女曲  
逾朝始澄霽物色如新沐城角趨去危亭登臨尉幽  
獨紛華掃不見胡蝶飛平綠竚倚窮夕曛悠哉此心

目

讀李益詩 甲子夏與彭城詩社諸君分閱唐

諸家詩采其平生人賦一章以姓為韻君虞  
益字也見從軍詩序

君虞興聖孫詩律早專美樂府度新聲宮醜奉天子  
鮮風獵蘭苕華月濯桃李獨有連眉郎才稱劣相比  
頗聞竹聽句流落綺紈耳吏曹久失調幕府感恩起  
從軍五十篇王粲慙率爾胡沙動霜草開卷得千里  
騫翔大蓬拜轉顧觸排毀晚升八座崇謝事知所止  
高文茂支庶埋滅長已矣斯人今不止正賴數番紙

咄嗟齒逾壯日就無聞耻勉哉課謠吟請自田居始

田園樂 甲子八月與彭城詩社諸君會南臺

佛祠望田畝秋成農有喜色誦王摩詰田園

樂因分韻擬之予得邛字

昔我未去園幽棲淇上却分辭俠少事喜與農夫言

農老孰追從四鄰皆世婚機中工織婦籍上成丁孫

青駒自走磨黃犬長候門昨日春 開道遙望高原

西照牛羊下東風花草繁今朝夏雞鳴麥熟田頭喧

歸來息樹蔭課汲灌中園秋賽方及辰釀秫烹膏豚

叢祠响腰鼓免杖奉神樽冬雪斷門巷蚕廬清且溫

地藉熊豹席爐明荆樞根起居就安適非復繫晨昏

不識百里面不知千騎尊供輸先衆期于我何威恩

太上復淳古坐超羲與軒敢忘天地施擊壤聲如塤

畢此百歲頽泰然長夜魂避秦誰氏子客死武陵源

此日足可惜 甲子九月彭城寇元弼席上賦

此日足可惜此樽何可辭人生信浮寓老境將安之

念昔青衿歲九七殊未知忽忽俯仰間復見趨庭兒

名繫冗從籍顧亦何能為撫此多病軀敢有黃髮期

每虞鬻犇走明哲永見嗤後日賣刀劍買牛耕故陂

不但力作勤農事有閒時慨想無心子清言真我師

部兵之狄丘道中懷寄彭城社友 甲子十二

二月賦

駕馬出北門徒御何遲遲日氣方洶湧霜陰亦紛披  
役夫前驅行少婦痛不隨分携仰天哭聲盡有餘悲  
雖非遠行邁要之為別離顧我豈無家從公難遂私  
且懷二三友缺此文酒期臨分各有贈婉思婉乎詞  
吟風一回首烟林失城池相思重相過斗黍為君炊  
三月二十日遊南臺 與陳傳道張謀父王文  
舉乙丑同賦互取姓為韻予得陳字  
晴春六十日不與酒杯親吏事豈無間風雨復兼旬

始作南城遊時物固已陳 不見桃李濃綠迷荆榛  
登高暫道遙引目清泗濱向田有交逕俯城皆要津  
得意屬禽魚可愛不可馴顧予千里客春此十日春  
胡不念爾生筋骸勞欠伸二十起丁籍一官初為貧  
併張西復東甌滿菜蕪塵黃綬彼何物豕苓安足珍  
山園有芳蘭幽佩手自紉長哦白雲謠遐想紫陽真  
去矣南昌尉庶幾乎若人

夏夜懷寄傳道 陳攝領雙溝戍稅局乙丑彭

城賦

疲筋任藜杖行樂下僧坊月出河漢白雨餘草木涼

有懷社子中引首東南望高韻少諧結何心事征商  
泗濱六七月萬柳鳴蜩蟬大舩軒哦東迎風坐胡牀  
投錢授券豈所試君長申退尚多暇不無金玉章  
而予方執熱思得濯滄浪雲牋儻寫寄珍重未相忘

慶湖遺老詩集 卷三

古體詩中 四十首

和張謀父遊石佛山觀魏大武書 按南北史

彭城圖經魏太平真君十一年太武南侵至  
瓜埠築宮駐蹕聲欲渡江宋人患之遣使請  
婚饋百牢以犒師明年春旋師渡淮復留連徐方  
再旬始北去今彭城南五里因山鑿佛高十許丈  
東北百步有大盤石欹枕小溪劃然四字曰阿彌  
陀佛皆徑尺餘特陀佛兩字為逸筆結之其長倍  
尋下落溪中蓋當時太武以鐵筆畫是字非

刊刻也乙丑秋張謀父摹墨本見惠兼賦一  
詩要予屬和焉

中夏昔屯否代邦天所開鴻圖屬太武不世英雄才  
南洗洛陽血西盪長安灰種車十萬乘略地驅風雷  
一葦濟長淮築宮瓜步隈東鄰拜牢籠走使為婚媒  
雲旗即歸路覽勝此裴徊俯揮鐵馬鞭頑石同陶坏  
劃成四大字屹栗陰虹摧淪精入崖壑怒氣羞蟠回  
茫茫六百年風雨生莓苔偉蹟寢銷泯威靈安在哉  
生存貴無上零落等塵埃君為訪古遊賦詩追七哀  
人生誰不介莫負手中杯

夜行鄒縣道中遇雨作 乙丑八月被外計檄

自徐趨鄆道中賦

昨日秋遂分却却斂禾黍半夜宿田人相噓去淡陂  
雨駸駸馬上客歇泥投何所暮發鄒子城朝期飯東  
魯據鞍思假寐顛墜慙不武俯畏道傍石積然如伏  
虎遠驚喬麥花白水漫洲渚安能叱吾馭親闈寄西  
楚念昔卧蘇門夙興猶及午豈謂從一官羈離遽如  
許歸歟惜遲暮幽悵將誰語賴介草根虫助我長吟  
苦

行路難 乙丑八月被外計檄召徐鄆往反千

二百里由荒山廣澤皆畏途也而期會甚嚴  
夜不遑息因賦是詩命曰行路難

驚颯獵榛莽西山匿頽陽四五陰魄晚繁星亦光芒  
驅車何所投却顧歸路長挾轅兩羸犇犯此豹虎場安  
得溼洼駸皎旦遊康莊豈徒寫我憂要使塵不揚

送寇元弼王文舉 文舉乃元弼女兄之子而

復妻以女寇之官符離之荆山戎王亦從行

乙丑八月彭城賦

無端嵇氏叟早結曹家偶不逐龍蛇藏翻從牛馬走  
東西祇強顏清鏡笑人頑歌枕知歸路開屏認舊山

甘心折腰膺為飽來西楚始驗釜生魚還悲廁中鼠  
兩君冰玉人傾蓋許相親何意塵埃地歛遊雲漢津  
佳時第行樂不與華年約大白酒交醺長箋詩間作  
俄報戎期秋扁舟去莫留臺卿淮水北和氏王坑頭  
飄飄同李郭到岍逢搖落俱是長年人得忘弥日惡  
勞生不自知會合復何時籠鳥檻猿思烹雞炊黍期  
此期諒難必幸勿忘今日固有夢依依可無書一一  
徐國壯山河黃樓入望多後時三五夕奈今月明何  
人生七十稀 元祐丙寅正月彭城賦寄朝中

三二知舊



人生七十稀行年今已半事功貴及時遲莫復何算  
嗟吾夙多負失怙在童州詩禮思有聞飄飄辭祖貫  
慈親念哀緒碎碎營婚宦名姓係西班星霜亟徂換  
未築黃金臺長歌白石爛豈無同心契相望眇雲漢  
每虞 颯至摧折澗底榦異日偶班輸抱柯徒永歎

和杜仲觀青字詩二首丙寅四月京師賦

青袍少年子獨出青門遊逢人少青眼凝笑望青樓  
窗中青娥女正為青春愁心事屬青鳥青驄能少留  
白馬青絡頭青萍寶帶鈎青溪流水急獨上青翰舟  
佳人青雀釵手把青荷遊慕君青雲器青髮結綢繆

送李主簿夷行之官河陰四首李字易初翰林

邯鄲公孫少年苦學元豐壬戌任東平戶曹  
掾揖彭城錢官子實為代元祐丙寅相遇于京師  
九月沂洛之官索詩為別遂賦彭城予贈李詩有  
它年會相訪分卧北山雲之句詩在別卷

夙昔一尊酒相從清泗濱回首歎四載長安逢故人  
交情久益淡辭筆老加新送子復西去勞生悲重陳  
古來英特士徃徃沉下僚念君鸞鳴姿俛首棲蓬蒿  
霜氣斂陂澤伊流纔半暮舟行何以尉酌酒誦離騷  
君才本高絕流俗固難諧桂生檣櫂林寧免相突排

勾稽諒多暇簾箔蔽公齋聖賢在黃卷差可遣人懷  
少小縻一官身世兩相補為飽西復東志願劣兒乳  
不無同心友頗豎折腰膺寄語北山雲異時吾與汝  
擬南梁慧侶法師歎杵搗衣 丙寅十月京師

賦

嶧陽桐杵鳴蓮岳石砧平待罪相應節要自不勝情  
吹衣風稍急弔影月微明 有不眠客聽此斷腸聲

擬阮步兵夜中不能寐 丙寅十月京師賦

夜久不成夢張燈開故書清霜屏雲物有月來庭除  
良時悵難再不與佳人俱掩卷長大息望子城之隅

擬鮑溶寒宵嘆 丙寅十一月京師賦

孤缸照愁眠明滅知夜久熒熒月落牀撼撼風入牖  
美人悵何許寤言不相偶心寄南征鴻雲漢長回首  
遊雍丘燕溪分韻作 丁卯二月領大匠屬治  
事至雍丘與故人吳擇仁智夫趙子漪澄之  
同遊因分韻賦詩予得漪字

捨轡步平綠解衿俯清池微風度修竹琴瑟生淪漪  
梨華照晴影暖雪正紛披把酒久沈想況與玉人期  
擬王少伯新興 丁卯四月京師賦

西北雲悠悠東南日杲杲浪語問陰晴懸知行雨少

桃溪換青蔭夙昔一何好臨牖思茫然微風動萱草  
送陳傳道之官下邳 丁卯九月京居病中賦  
兼簡彭城張謀父寇定應之

昔也官彭城日與君子親俱遊大梁下不見輒兼旬  
衣食牽迫人汗走長街塵相逢立馬語愁面如含辛  
朝來忽叩門頗驚黃綬新告我即東下得官淮泗濱  
方吾病中啜藥物苦殫負故人復捨去此懷難重陳  
想見經舊廬節候屬蕭辰朝尋張翁墅莫投寇叔鄰  
二字亦吾好尺書坐因循交情定相訪為話正迷津  
東畿舟居阻雪懷寄二三知舊 三首 丁卯仲冬

抱病之官歷陽舟次陳留賦

舟路江淮永歲寒冰雲深戍期良敦迫王畿方滯淫  
疲筋苦跼卧行藥長川陰雲物接平陸不見西飛禽  
風從城闕來如聞鐘漏音昕霧更東邁區區子牟心  
寒洛未漸結束趨江海深舟人驚朝鼓斂絳逗長林  
林端落滯雪沙際起鳴禽病客坐長嘆攝衣涕流矜  
親朋自茲遠可是慕山陰興盡莫回楫何人知此心  
云云清川流冉冉浮雲陰天寒日云莫魚鳥方潛沈  
吾豈猷安隱東浮違宿心一官未足養老境行侵尋  
牛歌感白石馬骨要黃金慙無子虛作萬里懸知音

留侯廟下作 按留侯本封沛國之留城今古  
祠存焉晉義熙中宋公鎮徐嘗下教修繕今  
祠中石刻雖破裂猶可識予官彭城日欲賦  
一詩忽忽不暇及丁卯冬洛洛東下阻水于  
陳留舟次有神祠特嚴邃榜曰漢留侯廟蓋  
邑人誤謂侯封為陳留也予時抱疾困因默  
有禱焉歲莫疾平賦此詩具冠笏拜謁高吟  
神生前償宿志也

文成念韓痛破產伺強秦千金募健士椎斷屬車塵  
東去變名姓浮游淮泗濱忍耻奉遺履得書何老人

十年風雲會赤帝資經綸鴻門禍端結一言即解紛  
英彭既合縱楚項提孤軍偉哉借箸談豎儒無復陳  
分疆餌兩將來若從龍雲釋怨俾侯印謀銷蛇豕羣  
定都天府國推功歸奉春四老落吾術拂巾辭隱淪  
東朝羽翼就楚調徒悲辛出處能事畢致君終乞身  
豈眷萬戶封僅與蕭鄴均淮陰敗晚節顧亦非吾倫  
顧訪赤松子逍遙雲漢津強飯示終歿爽靈方上賓  
嚴祠鎮川湄餘澤及斯民客子老將至低回冗從臣  
慙無應時策肝膈空輪囷可教固無類慨然輒求伸  
未應終萬古黃石獨能神

遊靈壁蘭臯園 集賢張校理治此園以奉親

因名蘭臯戊辰二月予舟行次靈壁訪張氏  
子碩于園中諸亭壁間得故人東萊寇元弼  
三四詩因繼題十八韻兼簡元弼

集賢昔榮養卜築循蘭陔淡徑萬株合清池百畝開  
飛梁蔭莖莖攢棟跨崔嵬淮海劉紅藥瀟湘移翠栽  
岱松佩蘿葦海石糊莓苔車馬遠驚聒魚鳥忘嫌猜  
病客倦舟楫尋春此裴徊閏年物候遲前日已聞雷  
薄景未晞雪東風新破梅主人京洛舊杖屨容參陪  
指我良隅地方營秋月臺眼明壁間字醉墨題東萊

短句頗清絕早推能賦才殷勤卷白苧為爾拂塵埃  
安得一攜手更傾林下杯酒闌話平昔豈復顧形骸  
行役浸相遠人生信悠哉薄莫重回眷長哦歸去來  
題楊子王輅故居清軒 戊辰上巳日賦

卜築負南郭寨開臨要津舟輿占集地奈爾獨清人  
坐上一樽酒江南千里春何須茂弘扇何患元規塵  
遊子感陳躅恍如平生親九原不可作歸老復誰鄰

遊金陵雨花臺 在城之西南蓋生公講堂故  
址也南郡石子岡登覽盡江南之勝戊辰三  
月舟次金陵與同行李延永遊西望石磧戊

才如數里之許耳

迢迢朱雀航飛蓋共凌越東風石子岡芳草微徑絕  
生公法堂在清夜貯明月回認城郭遊春華爛晴雪  
長烟動江隩微雲泊山脇連檣去遲回白鳥屢明滅  
江山信清麗人物久銷歇戎僮定荒涼投身計何拙  
塵衫與汗馬端為老生設李侯朱門俊許與盡時哲  
俛首就微班剛腸頗摧折人生特眠飯似是此身切  
歲晚賦歸田非君復誰結

宿法惠寺

在歷陽西南九十里戊辰四月七

日公事至順天里越斗峴山冷泉澗薄晚投

宿此寺寺三隅面山而豁其西北竹樹邃密如不與

人境相接庭中有泉如輪清冽而甘跨山起

小閣榜曰餘翠登望曠快因賦是詩題其上

驅馬越飛澗揚旌下田岡欵見層浮圖高風振琅璫  
重門壯且淡老柏森然行佛子出延客投鞭步長廊  
中庭汲新泉一飲生清涼孤坐興登覽危梯趨上方  
蕭蕭荒竹林簷外如環牆樵牧斷行徑龍蛇知所藏  
山禽喜喧囂嘯侶何琅琅子規特殷勤使人懷故鄉  
引領落西北暮色來蒼茫一官早見縻微尚久未償  
明發復東去斯遊良不忘

題香社寺平病湯泉 在歷陽西北四十里泉

石山東麓周環三十許步清澈而香或以竹木投其中清之一昔渥然如丹蓋靈砂伏其下故飲之并浴者疾多愈因名平病湯戊辰四月十日公事至泉上遂賦是詩

驪山御湯殿歲久玉蓮傾誰謂大江北有泉溫且清相傳白雲竇中閔丹砂英澡濯決肌骨沈痾亟能平豈特滌吾足徑當潔吾纓築廬俯源上涵泳鳧鷗輕非復星塵網御風朝玉京賦詩投楚澤用弔懷沙生宿靈泉山慧日寺 在烏江東北七十里戊辰

中元日八夜公事至此邂逅越客嚴生因賦是詩

日入不遑息驅車更之東回蹊出蒙密解袂迎長風風從何許來歷歷江南鐘頓響阿蘭若虛庭月正中流螢逗淡竹白鳥巢青松華燈耿翠箔瑤花擢春叢絕境羨清夜况非塵界逢惜無一樽酒幸與之子同明發即南北浮生兩飛蓬

曉渡黃葉嶺東谷懷寄金陵王居士閒叟 在

烏江之北八十里戊辰七月十六日自寶泉慧日寺之茅塘却路由此

陰谷不寓暑風松朝露零乳溪逗綠篠琴筑聲泠泠  
老石清金碧窅然沈列星酌此石上泉餌彼松下苓  
條欵振飛步豈徒制頽齡何須歷五嶽即蹈神人庭  
顧予方有役俗駕不敢停寄音采真子來卜白雲扁  
腰疼山浮圖下作 在歷陽西北五十里戊辰

十月賦

茲山非峻極名不載圖譜投策一躋攀未覺病腰膇  
蒼松帶寒日交陰層宰堵儼然黃面師粉繪色如古  
我貪五斗米磬折向兒乳復著鞍馬勞疲筋劇苔楚  
此身異金石能涉幾寒暑誅茅結圓廬宴坐此其所

清心日焚誦庶技未耒苦望塵彼何人碌碌安足數  
晚登柏子岡回望金陵懷寄鐘山泉禪師 在

烏江東北二十里己巳四月賦

晨征念王事駕駕煩屢咄既涉崔嵬高稍辭叢薄密  
烏牛霑宿露白鳥明初日清川解艇遲綠岸浮圖出  
緬懷秣陵遊曾綴秦淮緯曳烏白下門供去香金粟  
室得聞四句偈如奉三尺律損益非所知婚嫁行且  
畢度幾追老龐薄莫徼萬一哲將遷枳根待變江南  
橘

歷陽十詠 己巳五月歷陽張令夢 采縣境



陳迹十題要予同賦

麻湖 縣西二十里按縣譜本城邑漢明帝時  
一夕淪為湖湖中有明府主簿魚甚美皆昔  
人所化也今俗呼訛為麻湖焉

昔也萬家邑今為無底淵城郭泯遺迹人民安得全  
弔古一回首薄暮愁風烟極瀟不無意吾生後千年

雞籠山 縣西四十里按縣譜昔城邑將淪沒

神獨告一姥使西走即携籠雞登是山籠化  
石形猶然湖之東南有姥廟

楚姥昔犇迸餘生脫沈淪家禽不忍置信謂婦人仁

空籠欵變化千載高嶙峋可待麻湖水復生桑下塵

濡須塢 縣西南百里按縣譜孫仲謀築偃月

城以拒曹孟德即此塢也

孫郎昔鷹揚曹瞞方虎視敢忘板築勤遠挫兵鋒銳  
俄聞青蓋謠無復金陵氣六代迭傾止長江亦平地

遏胡城 縣西北三十里按縣譜昔石虎南侵

晋相王導築此壘以遏之

狂胡昔馮陵闊步長淮外難去此百雉城萬甲屯要  
害時平一登望江山互襟帶想像文獻公清風宛如

在

當利港 縣東二里下通大江按縣譜晉王濬  
征吳乘便風趨石頭王渾招之不顧即此地  
此詩當在過胡城之前

龍驤乘上遊銳氣吞敵境風便趨吳京收功在俄頃  
平生負雄圖晚歲方獲騁何必傳鼎彝江山與之永

天門山 縣東南五十里江導兩山之間殊端

悍按縣譜宋孝武嘗駐蹕此山上閱水軍發  
因建二石闕以夸武功今遺迹在焉

天門束箭流北注據牛弩凌高駐翠華舟師耀威武  
當時侍帷幄誰復徵徃古虞舜有苗征端為兩堦舜

采石硯 縣東南二十里瀕江兩硯相對按縣  
譜李太白嘗隱東硯上故址存焉

東西采石硯山水兩清絕漁舸與商舶今古几泐越  
飄飄翰林主長咲弄明月難訪物外遊飛雲眇天末  
百福寺 與縣廨鄰按縣譜即唐詩人張司業  
籍之故居也籍繪像今存

文昌西郭居修竹閑環堵琴樽不復存青蓮開梵宇  
塵紛晦遺像粉繪才可睹拜奠媿無言長哦君樂府  
桃花塢 縣西二里麻溪上按縣譜張司業之  
別墅也籍與孟郊載酒屢遊焉一茂林茂竹

尤占近郭之勝

種樹臨溪流開亭望城郭當年孟張輩載酒來行樂  
斯人久埃滅節物今猶昨看取不言華春風自相約  
平痾湯 縣西北四十里按縣譜湯泉下伏丹  
砂浴之能愈疾故有平痾之名即劉夢得歷  
陽記所謂沸井者也

文礎護清漪炯若涵冰玉澡滌起沈痾功參靈劑連  
荒唐桑氏經瑣碎桐君錄利物本無窮何須塵簡牘

慶湖遺老詩集 卷四

古體詩下 四十一首

三山 在金陵西南百里掘起大江之中昔王

龍驤順流鼓棹徑造三山謝玄暉登三山望

京邑皆此地也戊辰三月始遊金陵置酒于鳳皇

臺引望此山如落天外雅符大中詩中語既

渡江至石磧戍門適與山對己巳六月賦

南朝鳳皇臺置酒昔高會酒酣望三山宛在青天外

長哦謫僊吟如啖鯨鯢明日信東風孤帆出其背

荒戍接江濱開門適相望昂足踟長川不為舟楫礙

雨暘雲吞吐早晏潮進退萬古免浮沈曾微忤鼇戴  
伊予散塵空閉目何可奈爽氣豁衿靈山乎吾有賴  
嘗聞晉阿童萬觴飛戈快徑造此山陸滄波為之隘  
我疲軟姿功名讓前輩玄暉昔憑眺物色頗有在  
他時挂武冠刀劒行且賣山價略可酌庵棲謝當代  
遠持三山矧况彼七里瀨猶得傲狂奴吾無故人待  
望夫石 在當塗北山上與歷陽當利門相互

己巳八月賦

亭亭思嬾石下閱幾人代蕩子長不歸山椒久相待  
微靈蔭髮彩初日輝蛾黛秋雨疊苔衣春風舞蘿帶

宛然姑射子矯首塵寰外陳迹遂忘窮嘉期從莫再  
晚如魯秋氏安結桑中愛玉質委淵沙悠悠復安在  
題烏江湯泉寄老庵 庚午七月賦  
兩庵松竹淡薄莫更微雨山禽不畏人嘲啗方對語  
而予倦宦者罷日今何數京邑夙所懷其如惡塵土  
行復念斯遊回頭悵何許

罷官有期懷寄歷陽朋好 庚午八月賦

迅雨蕩闌暑層飈披滯雲汀川繚楚甸新陽歷秋旻  
物候豈不嘉中懷愴離羣新朋滿城邑繫滯此山濱  
及瓜信匪遙遂作河梁分何人具供帳樽酒展殷勤

一聆雪兒歌載 遊子魂津鼓警朝夢 烟生夕曛  
所悲紫蘭纓復 京洛塵春風有歸雁報我相思文

樣舟秦淮雨中寄侍其服之 庚午十二月賦

蓬卑每礙憤倉狹才容席悽酸擁膝吟奈此風雨夕  
欣聞鐘漏旦懷彼南城客欲往從之遊塞塗沒吾屐  
方君慕樓道顧已淹行役後夜歲云除畸辰良足惜  
何當斥氛開新暘被東陌壺觴殿兩驂聊取一日適

金山遊 辛未二月舟次廣陵同建安黃材成

伯黃樞集虛郡人陳庚敏善武寧張思永子  
修為金山遊賦詩得上字

輕舸放中濡岸遠春風壯檝師俯仰呼天水爭簸蕩  
吾方扣其舷聊賡小海唱梢回即東麓側磴聯屨杖  
危剝表層巔疲筋 牽強斜廊繚複殿魚脊分背向  
放目四垠寬秋毫入吾望侵雲鐵甕壘崛起去緣傍  
映日海門山不帶滄波上吾雖百石吏平昔有微尚  
得金仙徒剪蘿開岫幌誓投桑榆年浮玉翁自况  
金山化成閣望焦山作 辛未二月與二黃陳  
章四子同賦予得中字

朝登化成閣寫睇滄江東巋然瘞霍山屏截橫流中  
雲煙生蔽虧水石相磨礮飛 高宗 廟諱 結岩腹天龍嚴佛宮

廣濟遺老詩集 卷四  
初無剗木智不與塵界通曠莽天地間勝事豈易窮  
將謀乘興人難去此迎潮風可信浮桴約僅有由也  
同我亦念行役翻如征北鴻他日一漁艇悠悠浮玉  
翁

金山夜集招米芾元章不至作 辛未二月與

二黃陳章四子同賦予得王字

芳洲擷蘭珮清夜棲寶坊晚風駕飛濤柱石搖長廊  
微月逗簷際助我燈燭光黃童天下才疊疊陳與章  
歌間險語捧腹屢烘堂惜無杯中物可以延楚狂  
興闌半道去浪學山陰王明發吾將還滄波渺相望

如何方外徒漫仕煩官倉端爾涼秋節白雲來帝鄉

廣陵山光寺夜集留別黃材昆仲 辛未二月

賦予得平字

維舟山光步却顧廣陵城十里春風外夾津芳草生  
漁蓬斲尾來媿爾故人情更卜連牀語神房溫自清  
語闌夜自久淚燭剪復明 樽兀相視酸涕流金纓  
我本山海士誤遭時網嬰出身兩紀餘何等為浮名  
矧此一分首幾年當合并離憂如驚濶蕩滴未易平  
疎親繫遠邇斯言出荒愴音郵無禁限動訪白雲兄  
題崇勝寺無心庵 辛未六月京師賦

老宦依林表孤雲寓山間結茅窮釋子著身如許閒  
有心即塵紛無心猶石頑有無心併置日莫客來還  
和錢適德循寓懷二首辛未七月京師賦時與

錢鄰居

悠悠北山雲冉冉東門草紛吾起故居與適即遠道  
巔崖博錙銖得不償所耗寄語鄰墻翁歲晚從吾好  
魯酒味自薄楚歌聲更悲曾無忘憂用安事酒歌為  
西風激商序流芳迫衰遲寄語鄰墻客茲非行樂時

題天清寺安上人北軒辛未八月京師賦

南城繁音氏臺維昔孝王築歌吟寂無聞萬楹聯佛

屋道人開北牖俯就百喬木八月鳴清蟬槐蛾委平  
綠客未借榻卧吹睡俄頃足踈雨隔斜陽垂虹跨長  
陸良遊悵遲後回謝三更醪瘦馬尾華軒汗顏塵一  
掬昨非勿復道佳約猶可續載酒定何時新黃糝庭  
菊

感庭棗辛未七月京師賦

昔來華纂纂遽許實離離西風會搖落行復見空枝  
歲物感流駛事功傷暮遲咄彼身後名前人端自欺  
書殫南山竹奄奄定鍾知賢哉張生翰千載與心期  
送表侄趙子億之官滄州兼簡通守李廷寧

字叔永辛未十月京師賦

吾昔遊浮陽童心初辨狂凌高瞰海日徑欲窮扶桑  
 歲紀忽再周此圖竟莫償今適送子往臨風但彷彿  
 之子公族秀祖基維懿王成吾家宅相裂封復吾鄉  
 汝翁同谷守視吾猶雁行後生古所畏之子未易量  
 筦庫方試吏事役須更平嘗譬彼汗血駒齒齋即騰  
 驤是宜勤夙夜動虞三尺妨勿憚川陸遙千里如鄰  
 墻勿計弦晦餘俛仰度三霜邊朔昔云苦今歌海隅  
 康正賴別駕賢不減晉王祥依投得吏師行見售所  
 長為吾語故人曩契想未忘願致雙魚封繼以一鶚

章

夏夜雨晴遣懷 癸酉歲京師春夏厭雨吾居

望春門東牛行街故西樞渤海公之高齋嘉  
 樹清風殊不知暑溼時卧病杜門每把書自  
 適五月望雨始收霽疾亦少間因賦是詩

積潦被廣陌誰過牛僧翁閉關養疴瘵藥石收良工  
 高齋俯嘉榭踈箔延清風左右列圖史披張俄一通  
 從啜懶祭魚聊學蠹書虫坐挹古人語孰云吾道窮  
 浮生夢境問不帶之驚蓬生死猶物化今昔賢愚同  
 分陰賤垂棘白日莫再中薄莫紛滓澄寥寥還太空



為問此何夕涼蟾生自東荒哉西園士聯蓋追輕鴻  
行樂以至斯不知息微躬側聆天雞鳴凡耳初破聾  
吾從汗漫遊遡景鞭垂虹濯纓咸池淵晞髮若木叢  
親串不我忘惠音赤鯁公長哦賦來歸閱 世上雄

寄題栗亭縣名嘉亭

邑令趙洋更此新亭名

取杜甫同谷紀行詩栗亭名更嘉之句因其  
親能希邈求吾詩癸酉九月將扶疾東下感  
而為賦

少陵昔避地幽棲鳳皇川始願獲其所賦詩此終焉  
睠彼美林麓蔭膏腴上田陽陂鏡垂珠陰谷繁玉延

長鑿勤采劓服食攀飛仙兵祲奪和氣力耕無善年  
林垌開冰雪旬決斷庖烟嗚呼歌七章莫 西南遷  
環堵久蕪沒斯亭名尚傳茂宰愴懷古增崇殊過前  
雕甍揭長簾下容十客筵嫩嵐隔春叢清竹鳴夏蟬  
風月有高興寫之武城絃狂客屬廼廢駕筋難強鞭  
何暇遠登覽但哦鯨海篇尚苦八口累依稀全曩賢  
餘齡寄幻境未斷東西緣江淮米價平一舸去悠然  
幸此歲豐樂浮遊吾所便異時訪陳躅復使後人憐  
遊盱眙南山示楊介 楊善方藥著書甚多癸  
酉十一月與之同遊賦

曉霜無輕颺長淮淨如眼招携南山遊老子興不淺  
不從千步橋飛渡一漁舸中流鼓素楫魴鱖歎驚跳  
禪叟延游客匆匆問行色千里遠京關浮驂去安適  
長笑指滄浪濯纓前我裳朱門曳裾地槐柳自成行  
多年困靴板未立中人產沈痼迫衰遲求田咄何晚  
神凡儻駐延投此寄餘年鑿室鄰楊氏然薪繫太玄  
酌別盱眙杜輿 杜字子師方築淮上東山之  
居寄詩要予檣舟以待其還時聞楊子江潮  
不應輟浙右之遊將訪親于海陵因賦此告  
別癸酉十一月也

君希謝太傅築室卧東山應携玉人去為問何時還  
扁舟欲之東霜落江潮慳難從京口渡且轉廣陵灣  
與君合復離恍若愁夢間嬰疾再寒暑醫師憐我頑  
頽齡未遽盡解組誓投閒幽岩有芳桂晚節約同攀  
留別龜山白禪老兼簡楊居士介 癸酉十一  
月癸巳朔風下淮晚次龜山白禪老見臨乃  
歷陽之舊也因賦此詩以別

汴尾望龜山人烟了可數長淮斷音鍛日風浩若千里  
阻舟無百石載兩腋憂雙鰲首盪頽波中流几翔  
舞維梢追曛莫坎坎禪林鼓曳錫辱來過依然識眉

宇青熒燈火畔再得親軟語多慙晚聞道忠義夙自  
許剛腸憤激際赤手搏豺虎過壯纏百病餘生托兒  
乳羸軀假火緩宣復勝冠組會約子雲孫西岩兩庵  
主

題海陵開元寺樓雲庵 寺即唐王屋禪師道

場甲戌五月郡守周開祖要予同賦

道人猶浮雲發彼王屋岑朝見膚寸合莫為四海霖  
造物一戲耳浮雲本無心永謝應龍召淡棲雙樹林  
蒼生熱惱地千載仰慈陰皎月示弦晦清風何古今  
誰舉甘露頌轟然海潮音支離病居士和以無絃琴

寄題潯陽周氏濂溪草堂 周本江華人名敦

頤字茂叔仕至尚書郎累使嶺表中年投節  
退居溫城之南溪上因名濂溪以自況二子  
壽字元翁燾字次元相踵第進士丙子五月  
予槎舟漢陽始與元翁相際求予賦此詩

濂溪之水清未足濯公纓平生抱苦節成就此溪名  
長笑置符傳孤雲歸思輕溪頭四壁居溪下百畝耕  
量汲奉晨盥課樵共夕烹希逢杖屨遊但聽絃歌聲  
為客剪三徑傳家通一經雙珠交照乘合璧倍連城  
被褐有餘樂問縑無隱情桂林兩枝秀借尔俗眼明

昔仰名父子今推難弟兄不應文範裔遽謂公慙卿  
如襲帶礪封母為權利傾地實寢丘比有力安得并  
勒詩高岸石敢告後代生

送周壽元翁西上 丙子七月賦予時卧病漢

陽

露草蔓前庭微虫思明月霄分耿不寐懷我友生別  
舟師望箕宿綴幔須明發鷓首托歸風安知川路闊  
夫君青雲士行奉紫宸謁一鶚挾塵籠騫軒應霜節  
仰追鳶雀駕肯顧狐兔穴越客寓荒城卑樓慕鳩拙  
哀遲積疴弊未灰人事缺懶製一緘書寄聲彼朝列

方今百廢舉衰職補何闕每自幸餘齡江湖傲華髮  
躬耕固難強五斗代薇蕨摩腹遡南薰蒼生解煩唱

題陶靖節集後 丙子七月寓居漢陽手校陶

集因題其後

淵明不樂仕解組歸柴桑遡風北窗下坦腹傲羲皇  
儲粟既屢空乞食何惶惶有身即大患斯語聞伯陽  
顧我亦多忤丘焚思退藏慙無辟粒術圭勺耗官倉

補感遇詩 予熙寧元豐間嘗賦感寓十數詩

久忘其藁丙子七月因曝藥楮得此篇半已  
裂去不可記遂補成之時寓居漢陽

廣湖遺老詩集 卷四  
猛虎未出柙擾如搏鼠狸蒼鷹方在鞬孱甚伏卵雌  
弭戢以違禍孰云介無知幸遭縱釋仁返謂人可欺  
豈復念前辱搖尾垂翅時擇肉斃儕類戕忍猶天姿  
吾將罪虞者奈何生致之南山有重阻鄧林無膠枝  
機穽與羅罟今也將安施

黃鶴樓 在鄂州使宅之西南隅唐閻伯程記

云圖經載費祿登仙嘗駕黃雀返憩于此遂  
以名樓焉并見于神仙傳述異記按蜀書傳  
本江夏郢人也為刺客郭循所害豈道家所  
謂兵解者與丙子九月始登此樓因賦

登真者誰子昔有費公禕白日玉書下青天駕雀飛  
此地少留憩神標悵依依振裾謝塵濁與爾方遠違  
層樓寵陳迹江山長四圍登臨美商素雨氣薄西暉  
水落洲觜嫩風豪帆背肥飄然起遐想琳館闕岩扉  
明月識悠闊白雲疑是非金桃未遽熟薤露虞先師  
高樹兩華表長招羽駕歸靈瓢五色劑定與遺民揮  
自顧非仙質延生猶可希刀圭儻不怯如飽首陽飢

鸚鵡洲 在鄂州南浦上按圖經云因禰衡賦

鸚鵡于此洲遂得名後黃祖殺衡投尸此洲  
下胡曾詩禰衡珠翠逐江流是也丙子九月賦

鸚鵡籠下鳥能語奇羽毛羅爵巧相致瑀籠關鑄牢  
長懷故園樹烟雨落空巢萬里遷澤國舟與勞  
正平托物賦健筆不停操千載訪陳躡晴沙葭茨高  
珍禽不復見慨想若人豪處士起河朔英風拔時髦  
文章儼墳誥俛就猶詩騷兒女命楊孔奴兵視劉曹  
姦雄可奈此束之投楚郊忤俗竟非命惜哉時不遭  
非無擇木智天下方滔滔遺幹泯魚腹浮魂誰復招  
近結屈平好佩蘭雜申椒遠慙子胥烈怒氣翻秋濤  
空餘芳草碧恨血滿江皋

懷寄周元翁十首丙子十月江夏賦

周郎假沔官我偶來沔居得閒定相過談笑沈痾祛  
俄聞戍樓角曉引吹咽嗚自君居溢城恍恍一夢餘  
復求若輩人陶竈搜璫璣誠為天下士豈特江漢無

周郎嗜茗飲偶與吾好同贈行發吾寶紫璧瑀雲龍  
此寶大官物分甘玉堂公我曹百戶吏藜藿每不克  
詩人盍得嘗可以驕萬鍾願君間一歎十里共清風  
周郎塵外人冰甃立寒玉去我千里餘炯炯長在目  
有德且有言可采篆繅竹未為造物憐方徇斗筭祿  
司晨屬羣雞安事彼鳶鵠聊自况疲駕鹽車不為辱  
周郎妙雅道五字可人師許與非不嚴奈何取我詩

我詩如秋虫徒增長年悲指疵固有望逐臭得無嗤  
詩鳴人必窮我窮豈可宜願君勿閱此晚節益經奇  
周郎歸灑溪旱燥害嘉穀仰飽百指餘嗷然坐空屋  
應書乞米帖得繼朝來粥行陞大夫籍月賜萬錢祿  
振頭屬它年盤殮羅海陸毋忘佛子言不食大夫福  
周郎西笑時疊寄兩函書情親語懇到骨肉所不如  
妙翰騁道放抵突黃與蘇黃癯曳羸筋蘇厚凝脂膚  
我于季孟間增少損有餘家雞敢復道儲此橐中珠  
周郎走王都馬足塵翻波賀老宦江夏無人驚雀羅  
出處躁靜間奈此負病何平生解指誓晚境勿婆婆

迫死不得休前言食已多尚敢獸聞冷歎為赴火蛾  
周郎強仕年藥石甘苦口得無耗天和湯劑禦衰朽  
空華與色種種竟何有妄愛溫柔鄉蕩然不回首  
坐令松桂姿凋脆等蒲柳幸勿易斯言前車鏡湖叟  
周郎有史才班馬可並驅紛紛讒謔人畏君筆削誅  
我恨接君晚要亦君之徒沈疴積歲月願此留須臾  
志我壙中石賴君文不諛庶乎陵谷變名字見君書  
周郎貫江華而復厭湖湘我亦非樂此西歸計茫茫  
頽年把沈疴生理豈得長後期真何時存歿兩相忘  
懷君輒賦詩落筆聯十章它年一掩卷為我涕浪浪

題武昌鄭判官直節亭 鄭名淡字文通植竹

開亭于官舍東南隅名直節以自況丙子十月落成求詩為賦

開亭榜直節寵介青琅玕歲晚傲霜雪不同天下寒  
挺立百丈夫被之古衣冠春華白粉澤正色莫敢干  
越客與祭覽微吟復長嘆六鰲方抃戲雲海翻狂瀾  
儻逢龍伯公何憚剪一竿岐山鳴鳳鷄久刷五色翰  
何以慰朝飢美實來加飡高材陋時用自持良獨難  
不願載樂管伶倫非古官浪遭野王輩三弄為人懽  
願製殺青簡燦然漆與丹褒貶約魯史終古垂不刊

顧此託根地辱哉久泥蟠

題潘大臨東軒 潘字豳老隨親官漢陽關公

舍之東軒著書名左史賦詩見寄因答之丁

丑八月江夏賦

陳公少荒誕一室未遽掃事功竟何成老魅死不早  
潘郎治寓舍簟充無遺蚤庭砌蒔蘭萱未霜除惡草  
明窗幕輕素朝日上杲杲烟蔓擢熏爐松腴浮墨沼  
著書 魯史百傳見晚藁賊亂久逋誅吾方力窮討  
不應兩觀下僅獲少正卯坐可驕素臣俾渠眸子瞭  
而翁宴退食筆削日課了伯仲詠南陔餘風颯林杪



安知自娛適聊尉堂上老起居侍杖藜寒燠躬煬澡  
昏定仰屋眠是中亦大好

送咸寧陳令完夫移官吳郡 陳字保神丁丑

十月江夏賦

蒿萊東郭居長者車成轍禮經尚往來豈為我輩設  
臨分懷出錢津遠舟速發十月雁啼寒滄波洒微雪  
送君一樽酒孤飲聊耳熱會取屈平書商聲歌九闋  
開正到是郡場暖張燈節兩地見梅花相思不同折  
官閒羈絆 陳迹得搜閱虎去丘隧空燕驚宮火滅  
廊傾罷鳴廩蘭蕝香逕絕逮 故時人唯餘劍池月

名城見圖繪丹墨殊滅裂細與賦新詩長封寄天末  
老狐守丘志客子敢忘越未灰定歸東柴荆晝常闕  
右軍頷妙語年大不堪別沉復魚鳥情飛沈方此訣  
和潘幽老漢上屬目 戊寅四月江夏賦

白雲蒙山頭清川山下流芳洲采香女薄莫漾歸舟  
並蒂雙荷葉逢迎一障羞持情不得語大婦在高樓

慶湖遺老詩集

卷五

近體詩

七十二首

雨餘晚望

熙寧丙辰五月臨城賦

相應乳鳩鳴桑間  
返照平明津小舫  
度高隴一牛耕  
林藪歸心健塵埃  
病骨輕屈騷魂爽  
在未許獨君清  
自訟 元豐戊午六月  
滄陽賦

朝聽明鍾出莫隨  
衙鼓歸朝朝復莫  
莫是是與非非  
跡寄升沈路言投  
禍福机何窮百年  
事端使一心違  
待曉朝謁天慶作  
己未下元滄陽賦

望曉謁琳宮荒庭  
霧氣濃曾陪羽林  
仗如待景陽鐘

薄宦情無幾勞生夢不容  
樵朋與漁伴他日會相從  
送李易初還汶陽 癸亥正月彭城賦

客宦愴離羣徐方復得君  
青衫初試吏白面頗能文  
畫舸浮春水清樽醉舞裙  
他年會相訪分卧北山雲  
重送 張澤樂郊皆汶陽遊燕之地

夾岬雪初消青青見麥苗  
傳聲汶陽客已解木蘭橈  
春水生張澤春風動樂郊  
良遊知不負回首念無聊

春書 癸亥二月彭城

新蚕經浴罷舊燕未來前  
吏局坐如夢物華行可憐  
藻生南蒲釣雨足東皋田  
故國負歸約塵埃年復年

擬温飛卿 甲子七月彭城代王文舉賦

露網朱甍上風簾翠鎖前  
宿衾熏茗菡朝鏡拂猗連  
津潤銷金筆香依撲粉綿  
度閒雙陸子撥恨十三弦  
鸚鵡殷勤語旃檀委曲烟  
鮫綃乾玉筋魚鑰限金蓮  
團扇訓桃葉烏絲代杏箋  
朱門長宵宵白馬自翩翩  
難釣三珠樹徒拋七寶鞭  
酒闌應有待夢破即無緣  
信鵲新秋去孤蟾後夜圓  
浪言墻外地的是洞中仙

快哉亭朝暮寓目 二首

風起喜舒曠徑趨城上樓  
初陽動禾黍積雨失汀洲  
水牯負鳩鵲山樞懸括萼  
坐慙真隱子物我兩悠悠

積潦際危堞登臨西照中苔衣罨白羽槐蔭縣青虫  
不淺胡牀興無多團扇功目窮猶起羨演漾一漁蓬

題張氏白雲莊

彭城張謀父居泗洲之東山

耕田數百里中擇夾壇列樹松竹結茅其間  
榜曰白雲莊甲子九月置酒招予與寇陳王  
李四子酒酣賦予得雲字

江右陶徵士高風昔所聞應慙五株柳難比一溪雲  
我有乘桴約君方植杖耘悠悠竟何得晚歲益同羣

賦得枕上聞雁

用天字甲子冬至日寇元弼

席上賦

朔風飄驚雁寒聲徹枕前遠遶沙漠雪不下汶陽田  
客夢悲中夜歸期隔故年莓苔與菰米何處是湘天

和人遊白雲莊

二首乙丑正月晦日與予鄉段

詢慎從 成父寇元弼步出彭城之上洪門  
泛舟訪張謀父于白雲莊晚歸皆被酒段集  
古人句成二首示同遊予因走筆和之以送  
謀父後旬 慎從感疾物故張復出是詩使  
人泣歎弥日

原野正春風登臨一醉同陰晴時未定今古思何窮  
山勢落還起溪流噎復通隱君方自得可羨余冥鴻

慶湖遺老詩集 卷五  
可愛白雲翁前溪槎釣蓬耕樵一逕下井臼四鄰同  
倦宦終何得餘生寄此中預煩多種林毋使酒栝空

早夏 乙丑彭城賦

吏役初無補端令樂事妨不知春遂去但愛日何長  
薄雨梅含核溫風麥擢芒須容退食暇一枕夢吾鄉

辭酒 乙丑正月彭城南豐席上賦

魯酒一樽薄吾愁萬斛多塵埃斬馬劍涕泗飯牛歌  
髀肉生如許顛毛黑幾何功名可復道身世兩蹉跎

送陳傳道揖官雙溝 乙丑六月陳發彭城槎

舟漢祠下者累日子方抱疾不遑出餞因賦

是詩

弭節想登臨閒雲護日陰青蒲泗水闊古木漢祠深  
應醉盃中物誰聞澤畔吟禪房養病客輕別若為心

遊滕縣時氏園池 乙丑八月賦

珍重西園主開門待子猷城隅樹交蔭樓下水通流  
鵲鳴深竹蜻蜒駐小舟可能忘夢想塵土滿徐州

自鄆還徐道中 乙丑八月賦

八月過新雨行雲弄晚涼山川乍明晦禾黍半青黃  
西去真何事東還非故鄉悠悠塵土裏無路不亡羊

早發王邛道中寄李智父 乙丑八月賦

雞鳴戒徒御驅馬度前陂得兩人耕早邊山日上遲  
罷休何復道會合邈無期賴有西來水悠悠慰我思

暮投葛墟馬上 乙丑八月賦

旬決走千里塵埃如有緣慙無季子印可挾洛陽田  
廣澤雁行去荒山兩脚縣長亭猶未見疲馬不勝鞭

汴渠夜泊示 紹彥祖 元祐丙寅二月永城

賦

耿耿度中夜浩歌誰與誦屋頭風卷岸枕底浪澎舟春  
物行飄忽鄉心久滯留須明投吏部一醉驛西樓

丙寅舟次宋城作

水館四邊却登臨奈斷魂黃花開小徑紅粉哭高原  
舟楫逢新火松楸老故園斜陽一千里依約是蘇門

京居感興 丁卯正月賦時領將作屬

為問長安客何人識要津長持一馬箠浪走六街塵  
城闕烟中曉關河雪後春故園桃李在樽酒願相親

玉津晚歸馬上 丁卯清明京師賦

落日南城陌東風禁火時醉醒皆自得單袷正相宜  
綠樹侵高閣繁花洒曲池未應判節物可奈故園思

西城有懷舊遊 丁卯七月予以將作屬日至

瓊林金明督察營繕偶懷陳迹惘然因賦

西郭天泉里依依得舊遊綺羅紅芰曉絲管 蟬秋  
柳礙鞦韆陌萍沈袂襖舟年華勿復道誰為駐東流

苦竹邛南馬上 戊辰四月晦日歷陽賦

楚澤熏風後林皋夕照閒漁舫泐綠岸鳥道轉荒山  
久負杯中物長偷馬上閒悠悠白門路何日杖藜還

題諸葛洪田家壁 地名諸葛亮洪在烏江北

八十里與石頭城相望戊辰九月賦

晚度孔明洪林間訪老農行衝落葉逕坐聽隔江鐘  
後舍燈猶織前溪水自春無多遊官興卜隱幸相容  
訓桂林從叔 戊辰十一月歷陽遣使還賦

江到三湘盡山圍八桂深龍蛇寒下蟄霧露晝多陰  
迢遞馳棋信殷勤訪竹林淮南風土美留滯亦何心

寄金陵倉官趙令翬通宜 趙諸王孫戊辰十

二月歷陽賦

歲律倏云莫王孫興可堪羨雲歸日下隨雁滯江南  
卑溼求長健登臨奈半酣西州眼中近早晚寄華緘  
懷寄潘孝本兼簡其子言 潘字景仁時遊宦

嶺外己巳正月歷陽賦

春色先梅嶺秋聲後桂林溪通五羊險雲近九疑陰  
無雁難逢信有猿能伴吟一樽燒酒美應對阿戎斟

送張商老西山 張名夢臣吳郡人己巳九月

歷陽賦

霧氣歛陂澤鼓聲催客航蒹葭靡宿露鶴雀盤朝陽  
行役自茲遠離愁安可忘黃華一樽酒何處望吾鄉

題烏江東隆山鄧氏亭 己巳九月賦

逋客今何許空餘接隱亭舟隨潮水上門背夕陽局  
兔策塵生蠹漁策雨化螢題詩若下石聊代草堂靈

登烏江柏子岡懷景仁 己巳十月賦

驅車柏子岡引首東南望孤戍帶寒日長江流大荒  
故人越五嶺旅雁留三湘好待春風暖相期還北鄉

宿黃葉嶺田家 己巳十一月烏江賦

聚落荒山裏畬田歲不登牛衣障隙雪鼠穴見鄰燈  
愁信魚難暝寒凝酒亦冰悵然歌白石椎枕待晨興

遊六合定山真如寺 達磨第一道場己巳十

二月賦

隻屐西歸遠何年此布金地寒蒼檜老歲晏白雲陰  
燒隔溪水斷樵穿徑雪淡祖心無處問俗駕晚駸駸

同道通師之香林馬上 庚午正月歷陽賦通

喜為詩從吾遊甚久

冰霜節候遲淮楚早春時白草風頭急黃雲日脚垂



鳥聲投古戍馬力倦長陂吾有官箴畏勞生介浪為  
題烏江岳氏昆仲歲寒亭 植柏亭下故命是

名庚午正月賦

新甫移根遠蒼然對兩翁閉門三尺雪仰枕一庭風  
東郭顏何厚西來意莫窮未應輸狹小釀酒待春叢  
送左禹赴江夏尉 左字塗叟庚午四月烏江

賦

汎汎青翰舟亭亭黃雀樓江山信清洒人物想風流  
美酒遣歸思新詩題勝遊有魚知不食端作置書郵  
高望道中 庚午五月烏江賦

積雨漲陂塘田塍插晚秧遠山宜薄莫高燕弄微涼  
馬草非吾願魚食饜此鄉歸期知近在猶待菊花黃

湯泉道中 庚午七月烏江賦

青石岡西下靈泉產藥苗山英如有待木客可相招  
蟬帶風移樹塵隨馬度橋颺鞭吟舊句歸路不知遙  
留別王掾元胥 庚午十二月歷陽賦

之子貫東牢青衫試宦遊顛非小賀比爽自阿戎流  
未即芸香拜俄先瓜戍秋孤篷別夜思霜月滿滄洲  
檣舟當利口待風累日懷寄城中朋遊 二首庚

午十二月歷陽賦

一葉寄津口怒濤安可乘朝風占酒旆夜爨乞漁燈  
牛渚逢新月秦淮想結冰故人他夕夢歌吹滿金陵  
離憂不可解罷酒獨登臨潮落江空闊雲繁歲晏陰  
愁鴟守漁罾怒犬突神林觸目增悽斷聊為澤畔吟  
重別王掾 庚午十二月六日自歷陽當利口  
放舟至沙夫王元胥載酒施訪別因留宿不  
發重賦此詩以貽

別訪難遽了不知寒夜長回燈撤盃案抱被宿舡倉  
載聽遠雞唱稍分征雁行臨風滿掬淚吟落一衿霜  
投宿清涼寺 庚午十二月望日自秦淮亭信

馬出石城門賦

建業衣冠集秦淮舟楫屯東西萬里客朝暮兩潮渾  
何處契心賞片時清耳根僕夫浪見問但出石城門  
金陵寄懷王掾 庚午十二月賦

征虜亭邊路望夫山下舟長江不隔夢明月祇供愁  
促席歌塵斷閒窗醉墨留惜芳橋畔柳誰繫木蘭舟  
秦淮夜泊 辛未正月賦

官柳動春條秦淮生暮潮樓臺見新月燈火上雙橋  
隔岸開朱箔臨風弄紫簫誰憐遠遊子心旆正搖搖  
鐘山法雲彥上人留中飡罷遊草堂寺 寺即

周顥故居辛未正月金陵賦

弭楫秦淮尾登臨殊興迴難消蔬飯飽更過草堂來  
日轉宮扉暝風披蕙帳開吾非海益令猿鳥莫相猜  
訓別法堂彥上人 辛未正月金陵賦

將別雁門師殷勤訪所之江湖懷北闕鷗鳥戀南枝  
朝隱非吾所山英不汝欺明年東下約春水漾蘋時

易官後呈交舊 辛未九月京師賦

當年筆漫投說劍氣橫秋自負虎頭相誰封龍額侯  
聊辭噲等伍濫作詩家流少待高常侍功名晚歲收  
辛未龍興節日懷王掾元昏 昨歲是日予解

舟渡江此詩京師賦

昨歲東溪口扁舟欲下江伴愁燈映幔欺睡月侵窗  
漫寄書連紙誰同酒一缸何當見之子聊使我心降

廣津門東馬上 壬申二月京師賦

津頭落帆鼓薄莫尚蓬蓼疑是秦淮口扁舟醉夢中  
不堪隋岸北塵土一鞭風傳語端能否伯勞飛自東

久病寄二三親友 壬申八月京師賦

早味攝生理百勞戕至真藥靈翻佐病詩癖竟窮人  
終負黃壚恨長違白首親一囊安可得四壁未應貧  
燈下塵編泪風前墓草春倘忘雞酒設腹痛勿多嗔

秋夜聞雨晨興偶書 癸酉八月京師賦時欲

秋疾東下

故國心馳北扁舟計漫東寒生一夜雨病涉兩秋風  
落泊籬根葉幽憂屋角虫何情悲節物聊自况衰翁  
謝米雍立元章見過 米名芾癸酉八月京師

賦

今古兩妙令雍立與太立當時號清白後日想風流  
吏軒庭陰午農歌野色秋吾非荀氏老愧尔德星留  
留別米雍立 二首米辨博有才具著山林集數  
十卷為人知者特水淫書學而已清狂多忤

嘗上章援予祠史之請不報輒已因以激之

癸酉十月雍立賦

明缸通夜語累塊寫胸中水癖推劉令書名浼魯公  
忌猜悲廩鼠逐熱賤雲鴻不乏佳山水東南著兩翁  
好在楚公子山林何處逢官身須自乞俗眼可相容  
叔夜嬾猶鍛伯鸞慵且春多慙方祿隱尔汝傲吳儂

寶應夜泊 癸酉十二月賦

伏枕漳濱後維舟楚澤邊筋骸非壯日節物迫窮年  
夜雨侵牀漏晨炊湊鼻烟勞生我其分十口亦飄然  
題甘露寺淨名齋兼寄米元章 米舊嘗居此

齊甲戌九月京口賦

日出天垠露江橫地軸分馳年悲落木羈思託孤雲  
重掃淨名室長招漫仕君悠悠德璋輩未辦勒移文  
龜山晚泊 乙亥二月賦

春候半寒溫維舟淮上却長林補山豁青草際潮痕  
久厭浮家役重招去國魂禪房欲舒寫烟雨促黃昏  
歲莫舟居卧病懷寄金陵和上人 乙亥十二

月淮上賦

野泊歲云莫念歸期更賒津童為過客商舶是鄰家  
雪窰魚依霖潮迴蚌委沙南州人健否不寄早梅花

寓泊臨淮有懷杜修撰 丙子二月賦杜公名

絃去歲總漕于此屢開燕寶訓堂

幕捲歌鬟列堂深密炬然臨風鳴羯鼓待月戲鞦韆  
短韻吟牋出長簷醉帽偏斯人違薄俗何減孟公賢  
舟發金陵望歷陽作 丙子四月賦

尚識歷陽道依然西照間風烟石磧戍林麓楚王山  
隔水一凝佇當年百往還誰憐躍馬客哀病再投閒

江行寫望 丙子四月當塗道中賦

斜照侵疎箔微涼逗小窗青蒲故依渚白鳥屢橫江  
遣興詩三 煎愁艣一雙前舟定未遠疊鼓聽逢逢

廣雅釋詁  
即官湖 按李白詩序云乾元歲流夜即遇故人尚書郎張謂使夏口沔州杜太守漢陽王令觴于江城之南湖張公四望超然請白標之嘉名白因號之即官湖席上文士輔翌岑靖以為知言今所謂即官湖者占郡城之北東于兩山間縱廣百許步固不足四望而超然也已知其非是郡南瀕江之人持南唐時地券尚指即官湖為鄰蓋湖為江水所并而去城里餘猶有洲渚隱然未泯乃湖之故防也予丙子五月舟次沔陽求訪遺老始得其詳因賦志之

當年賢守令載酒沔南遊涼月呈新霽明湖涵素秋  
即官夏口使仙客夜即因促膝青螭舫連觴紫綺裘  
高謹隨雨散餘躡想風流芳草失青屐滄波浮白鷗  
江吞百頃盡石刻一篇留宜有沈碑者前懷陵谷憂  
題寶泉官舍壁 寶泉監在夏郡城東三里黃鵠山之陰丙子八月到官後賦

偶著強名字非才但鑄金不妨稱外監况復任山陰  
勝日聊披卷清風故解衿餘生偷祿隱何等是升沈  
江夏寓興 二首 前篇丙子十二月賦後篇丁丑

五月賦

風與檣鳥便儂先寒雁來山經七澤斷潮自九江回  
漁父猶知隱騷人枉銜才朋遊正相遠梅信為誰開  
陂湖戲坊市江漢復縱橫沮洳莎城沾晴暘竹瓦鳴  
新文添鵬賦異味識龜羹豈復悲流落官糧寓此生  
九月十日寄潘邠老 丁丑江夏賦潘嘗許中  
秋重九渡江見過竟不至因以誚之

明月昔如許懷人殊不來徒歌桃葉曲又負菊華開  
尺紙緘愁去扁舟載夢迴它年雞黍約千里信悠哉  
送蒲圻陳主簿彥升歸越 陳字登之丁丑十

月江夏賦

好在稽山北因君訪故園風流久哀歌湖水自清渾  
可得千秋觀相傳百代孫時聞祖 客不減漢東門  
送金壇慎令璫 戊寅三月江夏賦慎字獻玉  
年少寡欲奉佛甚嚴

清素復多聞天涯晚得君相延蒲塞饌細演貝多文  
世味淡如水身謀散勝雲謾為花縣約聊慰此臨分  
寄題盱眙杜子師東山草堂 丙子二月臨淮  
賦偶止之庚辰十月再道臨淮復得于子師  
因附卷末

東山與物遠松竹蔭茅茨信有冥鴻志難藏霧豹姿

會招安石起何患德璋移後日富扉下游人想履綦



